



内閣文庫		
番號	漢	3018
冊數	2	(1)
函號	366	75

366-75





300-12

氏族博攷叙淺草文庫

天長寺藏

莊周曰六合之外聖人存而不論夫
聖人固不欲曉於天下或有不得
已者焉豈啻訾咕囁終無事於輔頰
舌也哉顧於六合之外不論何也天
下未有無因而強說者聖如尼父顧

難於開創哉使當是時六經之梗概
不遺於先王則安所賴藉以立刪定
脩贊之功也故尼父僅以述自居雖
若撝謙夫亦道其實而已至于六合
之外奚憑奚據聖人縱有懸河之雄
辯而可強以覆載所不及之處而容

其喙乎噫古今氏族豈易言哉炎黃
以前遐哉邈乎即六合外也自炎以
姜黃以姬而子姓始分降及三代則
以謚以官以邑國以王父字斯謂之
氏謂之族嗣是而秦漢魏晉下齒日
庶姓日繁而載之方冊者更僕未易

數也余未暇以秉筆者而枚舉之思
秦火未盡燔孔壁無禁而出之則方
冊所載槩皆有因而非不根之論也
凌大夫稗哲甫早年解組沉酣典籍
自六經諸子天文地志稗官小說靡
不咀嚼而鈎致之已輯姓譜卷一百

有五十而梓行矣復考方冊所載之
說彙為一編而折衷之題曰氏族博
攷授余讀之佐而嘆曰博哉良工
苦心乎讀是書而知其益無方矣如
吳魯之姓同姬徐秦之姓同羸願室
家者不得諧伉儷則由是以明婚媾

之禮矣如始以一姓為三派終以三
派各一姓篤親之誼者循等級則
由是以昭疎戚之分矣如唐虞夏商
之姓由帝王巫卜陶丘之姓由術業
論高卑者溯源流而軒輊之則由是
以彰貴賤之勢矣他如四聲之韻五

音之屬華夷之別支庶之分公私之
義一開卷而靡不昭揭焉紛然雜出
於方冊者固各有因大夫博攷而彙
之又因乎其因也非強論夫六合之
外也讀是書而知其益無方矣奚媿
於尼父之述哉大夫居家好閑有羔

羊素絲之風讀書也專述古也多
此其述之大者云烏程吳京朝卿父
誤

氏族博攷目錄

姓氏門

總論 氏攷 氏源 氏按 字辨 氏目

譜系門

總論 譜事 譜籍

族望門

總論 世家

附錄

氏族博攷卷之一

吳興 凌迪知 稚哲 纂

同郡 吳 京朝卿 校

姓氏

總論

舜典曰別生分類生姓也別其姓氏分其族類

夏書曰錫土姓以新生之土賜之為姓

傳曰若夫保姓受氏以守宗祊世不絕祀無國無之

傳曰姓者生也以此為祖令之相生雖下及百世而

此姓不改族者屬也與其子孫共相連屬其旁支別屬則各自爲氏

史記注曰天子賜姓命氏諸侯命族族者氏之別名也姓者所以統繫百世使不相別也氏者所以別子孫之所出故世本之篇言姓則在上言氏則在下也說文曰姓人所生也古之神聖神母感天而生子故稱天子因生以從女女生亦聲也

白虎通曰人所以有姓者何所以崇恩愛厚親親遠禽獸別婚姻也故紀世別類使生相愛死相哀同姓不得相娶皆爲重人倫也姓者生也人稟天氣所以生者也詩云天生烝民尚書曰平章百姓姓所以有百者何以爲古者聖人吹律定姓以記其族人各五常而生正聲有五宮商角徵羽轉而相襍五五二十五轉生四時異氣殊音悉備故姓有百也所以有氏者何所以貴功德下伎力或氏其官或氏其事聞其氏即可知矣所以勉人爲善也或云王父字者何所以別諸侯之後爲興滅國繼絕世也王者之子稱王子王者之孫稱王孫諸侯之子稱公子公子之子稱

公孫公孫之子各以其王父字爲氏故春秋有王子
瑕論語王孫賈又有衛公子荆公孫朝魯有仲氏孟
氏叔氏季氏楚有昭屈景氏齊有高國崔盧氏以知
其子孫也王者之子亦稱王子兄弟立而皆封也或
曰王者之孫亦稱王孫刑德放曰堯知命表稷契賜
姓于姬皐陶典刑不表姓言天任德遠刑禹姓姁祖
昌意以薏苡生殷姓子氏祖以玄鳥子生也周姓姬
氏祖以履大人跡生也

風俗通曰萬類之中唯人爲貴春秋左氏傳官有世
功卽有官族邑亦如之公羊譏衛滅邢論語貶昭公
娶於吳誤同姓也蓋姓有九或氏於號或氏於諡或
氏於爵或氏於國或氏於官或氏於字或氏於居或
氏於事或氏於職以號唐虞夏殷也以諡戴武宣穆
也以爵王公侯伯也以國曹魯宋衛也以官司姓司
徒司寇司空司成也以字伯仲叔季也以居城國園
池也以事巫卜陶丘也以職三馬五鹿青牛馬也
自族別而爲姓姓別而爲望望別而爲房故姓多則
訛其族望多則訛其姓房多則訛其望必然之理也

今夫劉氏一族自堯陶唐氏至秦爲劉氏而其姓有
六媯氏一族自舜別爲姚氏至齊王建之子別爲王
氏而其姓有四若是則姓多而訛其族杜氏一姓自
枝伯之沒爲杜城杜氏王赫子威之沒爲濮陽杜氏
一姓而五望張氏一族自常山王耳之沒爲河間張
氏至唐相亮爲鄭州張氏一姓而十望若是則望而
訛其姓清河崔氏一望而三房博陵崔氏一望而四
房趙郡李氏一望而六房隴西李氏一望而四房若
是則房多而訛其望

凡姓族異者所以別異人也猶乃物皆名有名以相
分別天子賜姓賜氏諸侯但賜氏不得賜姓杜預云
舜生媯汭賜姓曰媯封舜之後于陳以所封之土命
爲氏舜後姓媯爲氏曰陳故鄭驥異義云炎帝姓姜
大皞之所賜也黃帝姓姬炎帝之所賜也故堯賜伯
夷姓曰姜賜禹姓曰姁賜契姓曰子賜稷姓曰姬是
天子賜姓也諸侯賜卿大夫以氏若同姓公之子曰
公子公子之子曰公孫公孫之子其親已遠不得上
連于公故以王父字爲氏若適夫人之子則以五十

字伯仲爲氏若魯之仲孫季孫是也若子庶妾子則以二十字爲氏則展氏藏氏是也若男姓則以父祖官及所食之邑爲氏以官爲氏者則司馬司成是也以邑爲氏者若韓魏趙是也凡賜氏族者此爲卿乃賜有大功德者生賜以族若叔孫得臣是也雖公子之身若有大功德則以公子之賜爲族若仲遂是也其無功德歿後廼賜族若無駭是也若子孫不爲卿其君不賜族子孫自以王父字爲族也

雜編

宋朝先正嚴於姓氏之別如希文少依母氏冒朱姓

已稱朱學究也既長知其世家泣從范氏其視滕公隨外家而姓孫所見遠矣武襄遠祖狄梁公已有誥身可驗也公以一時遭際不敢免梁公之後其視郭崇韜哭子儀之墓所得多矣若夫司馬之呼聳聞大遠小范之稱驚動西夏則知姓氏以人物而榮子厚無行有玷郇公京卞儉人借名端明則知姓氏以人而辱或榮或辱皆由乎人彼區區冒姓亦何益哉自隋唐而上官有簿狀家有譜系官之選舉必由於簿狀家之婚姻必由於譜系歷代竝有圖譜局置郎

令史以掌之仍用博通古文之儒知撰譜事凡百官
族姓之有家狀者則上之官爲考定詳實藏於秘閣
副在左戶若私書有濫則糾之以官籍官籍不及則
稽之以私書此近古之制以繩天下使貴有常尊賤
有等威者也所以國尚譜系之學家藏譜系之書自
五季以來取士不問家世婚姻不問閥閱故其書散
佚而其學不傳三代之前姓氏分而爲二男子稱氏
婦人稱姓氏所以別貴賤貴者有氏賤者有名無氏
今南方諸蠻此道猶存古之諸侯詛辭多曰墜命亡

氏踏其國家以明亡氏則與奪爵失國同可知其爲
賤也故姓可呼爲氏氏不可呼爲姓姓所以別婚姻
故有同姓異姓庶姓之別氏同姓不同者婚姻可通
三代之後姓氏合而爲一皆所以別婚姻而以地望
明貴賤於文女生爲姓故姓之家多從女知姬姜嬴
姁媯姑妘姻姁姁之類是也所以爲婦人之稱如
伯姬季姬孟姜之類並稱姓也奈何司馬子長劉知
幾謂周公爲姬曰文王爲伯乎三代之時無此語也
良由三代之後姓氏合而爲一雖子長知幾二良史

猶昧於此

通志氏族序

按左氏之書子長之史記其載諸國姓氏與夫世裔皆有可疑者春秋之時諸侯之國凡一百十五可以知其姓與爵者四十有六晉楚之類是也可以知其姓而不可以知其爵者一十有八焦陽之類是也可以知其爵而不可以知其姓者一十有七沈之類是也其爵其姓皆不可得而知者三十有三鮮魚陸渾之類是也不知其姓不可得而見之矣而知其姓者又不可究信如以趙爲芊姓而子長又以爲姬姓以

祁姓鄆國爲重黎之後又以爲吳國之後此其言異同固不足論至於姜氏爲伯夷之後又以爲四岳之後是其言自相異同也舜之咨四岳有能典朕三禮僉曰伯夷若以四岳爲伯夷則是唐薦其才也豈其然乎此左氏之言姓氏所以爲可疑也子長之史記始于黃帝迄于漢武天子世次見於帝紀諸侯世次見于世家夏之後則爲杞商之後則爲宋以其世家本紀併而攷之則其苗裔歷歷而可考至於滕薛邾邠之屬雖其事見於春秋而其世次之不傳者又不

可盡信堯乃舜之從高祖而舜乃妻其女鯀乃舜五世從叔公與舜同為堯臣湯與王季同世也湯下傳十六世而為紂王季傳一世而為文王二世而為武王則是文王以十五世祖而臣事十五世孫紂武王以十四世祖而伐十四世孫紂而伐之必不然矣此子長之謂世次所以為可疑也大抵去古既遠抱舛承訛無所取正左氏猶然況子長乎子長猶然況班固以下乎左氏以嬴姓為伯翳之後班固又以為伯益之後韋昭遂以為伯益即伯翳也孟穎達復以伯

益為皐陶之子按史記之文皐陶之後封蓼六伯翳之後封秦垂伯益之後不知所封是則伯益伯翳皐陶各為一族翳與益不得為一人而益不得皐陶子

矣

雜編

周孔小史尊世繫下昭穆左傳衆仲曰天子建德因生以賜姓祚之土而命之氏諸侯以字為氏因以為族官有世功則有官族邑亦如之禮書曰姓非天子不可以賜而氏非諸侯不可以命姓所以繫百世之正統氏所以別子孫之旁出族則以氏之所聚而已

然氏謂之姓故大傳言繫之以姓又言庶姓別於上則氏與姓一也氏有謂之族故羽父爲無駭諸侯隱公命以爲展氏則氏族一也蓋別姓則爲氏氏則有族族無不同氏氏有不同族故八元八凱出於高陽氏高辛氏而謂之十六族是氏有不同族也商氏條氏徐氏之類謂之六族陶氏施氏之類謂之七族之摯氏謂之戴族向氏謂之威族是族無不同是也又襄四年曰穆叔如晉范宣子逆之問焉曰古人有言曰死而不朽何謂穆叔未對宣子曰昔句之祖自

虞以上爲陶唐氏在夏爲御龍氏在商爲豕韋氏在周爲唐杜氏晉主夏盟爲范氏其是之謂乎穆叔曰以豹所聞此之謂世祿非不朽也

太平御覽

三代之時曰姓者統其祖考之所自出者也百世而不變者也曰氏者別其子孫之所自分者也數世而一變者也天子建德因生以賜姓其得姓雖一而子孫別而爲氏者不勝其多焉有以王父之字爲氏者矣有以先世之諡爲氏者矣有以所居之官爲氏者矣有以始封之邑爲氏者矣枝分派別千塗萬轍初

若參錯紛亂而難考及徐而視之有綱有條猶指諸掌焉孟仲季臧東門子叔同出於魯也游國封印公父伯張同出於鄭也向華蕩樂鱗魚仲老同出於宋也欒高崔國叔仲東郭同出於齊也尋其流可以知其源尋其葉可以知其根抑何易耶自秦漢以來氏族之制出于上之所賜下之所更者絕無而僅有至於世守一氏傳千餘年而不變者天下皆是也其變非若古之屢其列非若古之多可謂簡而易知者矣然人罕有能辨氏族之源者王之氏一也吾不知出

於元城之王耶宜春之王耶邛城之王耶劉之氏一也吾不知出於陶唐之劉耶奉春之劉耶元海之劉耶其能明辨而不惑者鮮矣氏之馬者未必能辨其爲馬服之馬及馬矢之馬也氏之石者未必能辨其周衛之石及後趙之石也古之氏族繁而知之者反多今之氏族簡而知之者反少蓋由譜牒之明興廢而已以是知譜牒之學不可不講也

問姓氏如何分別曰姓是大總腦處氏是後來次第分別處如魯本姬姓其後有孟氏季氏同爲姬姓而

氏有不同某嘗言天子因生以賜姓諸侯以字為諡
因以為族竊恐諡本氏字先儒隨他錯處解將去義
理不通且如舜生於媯汭武王遂賜陳胡公滿為媯
姓此即因生以賜姓如鄭之國氏本子國之後駟氏
本子駟之後如此之類所謂以字為氏因為族事文類聚
前漢去古未遠風俗質略故太上皇無名母媪無姓
然唐宰相世繫表叙劉氏所出云晉士會適秦歸晉
有子留於秦自為劉氏秦滅魏徙大梁生清徙沛生
仁號豐公生熒字執嘉生四子伯仲邦交邦漢高祖

也高祖之父漢史不載而其名唐史乃載之亦可一

笑白孔六帖

武后嘗問張說曰諸儒言氏族皆本炎黃之裔則上古無乃無姓乎說曰古未有姓若夷狄然自炎帝之
姜黃帝之姬始因所生地而為之姓其後天子建德
因生以賜姓黃帝二十五子而得姓者十四德同者
姓同德異者姓殊其後或以官或以國或以王父之
字始為賜以久乃為姓唐虞抵戰國姓族漸廣周衰
列國既滅其民各以舊國為之氏下及兩漢人皆有

姓故姓之以國者韓陳許鄭魯衛趙魏爲多后曰善
近世乃有五姓謂宮也商也角也徵也羽也以爲天
下萬物悉配屬之以處吉凶然言皆不類如張王爲
商武庚爲羽是以音相諧附至柳官宮趙爲角則又
不然其間一姓而兩屬復姓數字不得所歸是直野
人巫師說爾白孔六帖
氏族之譌久矣凡蔣邢茅胙祭周公之胤也此三者
實一姓也自分爲三派寢遠寢忘則爲三姓矣退之
所謂徐與秦俱出韓與何同姓之類是也揚子雲于

蜀無他揚今此揚姓不復見亦皆襍于揚矣錢鏐有
吳越吳越之人避其諱以劉去偏傍而爲金王審知
據閩閩人避其諱以沈去水而爲尤二姓實一姓也
今之稱復姓者皆從省文如司馬則曰馬諸葛則曰
葛歐陽則曰歐鮮于則曰于如此之類甚多相承不
已復姓又將混于單姓矣唐永貞元年十二月淳于
姓改爲于以音與憲宗名同也至今二于無復可辨
如豆盧蓋唐大族欽望瑒革皆嘗爲相而此姓今不
復見其殆混于盧耶類苑

夫氏姓之著人倫之所繇叙風俗之所繇篤亦政教之甚急也而世或忽之使不明焉然則俗之澆惡豈惟民之罪哉古者司商以協民姓民庶之家無妄改也後世官曆之書反著天老乞姓之文此何為耶若是而欲氏族之不亂不可得矣武為蝮揚為梟蕭為蛸孫為厲此惡號也亦必有繇焉王為可頻李為徒何楊為普陋如而蔡為大利稽此夷語也然而猶可稽也奈何氏姓之書不知其繇乃復妄為之說如以雙姓為出蒙雙奇姓為出伯奇愚出愚公度出度支

軍本冠軍皇本三皇兒因語兒終因六終春則自於春申有則自於有巢居本於先且居西本於西門豹謂為匠麗之變謂冷為冷倫之訛芻因於牛袞之食芻茲因於才子之宣茲審出於面勢之審曲此何典故又若以童為出老童而洪出於共工箕出於商紂伊繇唐堯昌繇昌意累出累祖聃出於聃叔季載而卑本於卑耳之國其妄繆可勝槩邪上世書必同文而後世儒流視為小伎漫不之習無惑乎氏姓之失其統也且以山名非必從山鳥名非必從鳥草木之

氏族博攷卷之二
二四
百八十二

氏族博攷卷之二

吳興 凌迪知 稚哲 纂

同郡 吳 京朝卿 校

氏攷^上

同源異派第一

唐氏有二堯之後為唐周以封晉此晉之唐也伊祁
姓燮父之後封于唐為楚所并此楚之唐也姬姓
虞氏有二姚姓之虞舜後也姬姓之虞仲雍之後也
夏氏有二夏后之後以國為氏陳宣公之子子夏之

氏族博攷
卷之二
藏仕藏刻

後以字爲氏

商氏有二成湯之後爲商衛鞅封商君其後亦爲商周氏有五后稷之後爲周氏又姬氏唐先天中避諱改爲周氏又暨氏上元中淮制改爲周氏又代北賀魯氏普氏後魏竝改爲周氏

秦氏有三秦國爲秦氏魯有秦邑亦爲秦氏秦非是也楚又有秦商

燕氏有二有姬姓之燕有媯姓之燕

管氏有二叔鮮之後以國爲氏出自文王又齊管仲

出自穆王

畢氏有二畢公高之後爲畢後魏出連氏改爲畢

于氏有二周武王之子邾叔之後或去邑爲于氏後

魏萬紐于氏改爲于又淳于氏避唐諱改爲于

胡氏有二周之胡國爲胡氏後魏紇骨氏亦爲胡氏

齊氏有二太公之後以國爲氏衛大夫齊子之後以

字爲氏

楚氏有二鬻熊之後以國爲氏魯林楚之後以名爲氏

陳氏有四舜之後以國爲氏也又白氏隋初改爲陳
此萬年之陳也又魯相無子以外孫劉矯嗣此廣陵
之陳也又侯莫陳之後亦改爲陳氏

朱氏有三邾子之後去邑爲朱又渴燭渾氏可朱渾
氏竝改爲朱

婁氏有二邾婁之後也又疋婁氏改爲婁氏

兒氏有二鄆氏去邑爲兒又賀兒氏亦改爲兒

越氏有三勾踐之後以國爲氏又有越疆氏改爲越
氏又有越質詰氏改爲越氏

薛氏有三奚仲之後以國爲氏又叱干氏改爲薛又
有遼西薛氏

沈氏有二沈子逞之後以國爲氏又莊王之子公子
正封於沈鹿其後以邑爲氏

徐氏有二若木之後以國爲氏又一族出於黃帝十
四姓

云氏有二邳國之後去邑爲云又後魏牒云氏改爲
云

禹氏有二鄆國去邑爲禹又夏禹之後以名爲氏

宿氏有二風姓之後以國爲氏又有宿六斤氏改爲宿

羅氏有二妘姓之後以國爲氏又有叱羅氏改爲羅夔氏有二熊摯之後以國爲氏又天竺亦有夔氏夷氏有四夷詭諸之後爲夷氏又逸民夷逸齊大夫夷仲年邾大夫夷射姑之後皆以名字爲氏

須氏有二密須之後爲須須句之後亦爲須黎氏有三子姓之後以國爲氏又齊大夫黎彌且以邑爲氏又後魏素稽氏改爲黎氏

申氏有二姜姓之後以國爲氏又楚之申邑申公居之以邑爲氏

向氏有二祁姓之後以國爲氏又宋公子盼字向以字爲氏

葛氏有三羸姓之後以國爲氏又葛天氏之後亦爲葛氏後魏賀葛氏改爲葛

權氏有二顓帝之後楚王滅權子孫爲權氏又鬪緡尹權因以爲氏

會氏有二鄆國去邑爲氏又會邑之後亦爲會氏

辛氏有三莘氏訛為辛又計然本姓辛又周有項亶
賜姓辛氏

呂氏有五姜姓之後以國為氏又晉有呂氏出於魏
氏又叱丘氏副呂氏叱呂氏竝改為呂

戴氏有二戴國為鄭所滅子孫以國為氏又宋戴公
之後亦為戴氏

譚氏有二子爵以國為氏又巴南六姓有譚氏

冀氏有二冀國之後以國為氏晉滅冀以為邑邠氏
食之為冀邠子孫以邑為氏

顓臾氏有三伏羲之後封顓臾子孫以國為氏又去
顓為臾氏或去臾為顓氏

鬲氏有二有鬲之國以國為氏又商人膠鬲以名為
氏

顧氏有二顧國夏商諸侯也又勾踐之後別封顧余
以邑為氏

共氏有三共者商之侯國也其後以國為氏鄭公子
段曰共叙晉太子申生曰共君以諡為氏

廖氏有二風俗通云廖叔安之後或言周文王小伯

虞之後

龔氏有三恭國籀書作龔又晉大夫龔堅之後也又漢邑郡蠻酋有龔氏

梁氏有二伯益之後封於梁以國爲氏又有拔列蘭氏改爲梁氏虜姓也

洪氏有二共氏改爲洪氏又豫章弘氏避唐明皇諱改爲洪氏

彭氏有二大彭之國爲彭氏祝融之後八姓亦有彭氏者

祭氏有二周公之後以國爲氏又鄭有祭邑祭仲是其後也

蘇氏有二祝融之後陸終生昆吾封於蘇以國爲氏又拔畧氏改爲蘇氏

毛氏有二毛伯聃之後以國爲氏又有北狄之族世爲酋長

樊氏有二仲山甫食菜於樊因邑命氏又商七族有樊氏

劉氏有五堯之後有劉累爲劉氏成王封王季之子

於劉邑亦為劉漢賜項氏婁氏竝為劉氏又匈奴之族從母姓劉

樂氏有二晉樂賓之後姬姓也以邑為氏齊子樂之後姜姓也以字為氏

路氏有四路子爵晉滅之以國為氏又黃帝封其支子於路又姬姓帝摯子玄元堯封於中路歷虞夏稱侯子孫以國為氏又沒路真氏改為路

荀氏有二荀本侯國也又晉荀林父以邑為氏

丙氏有二邠豫之後或去邑作丙又李陵降匈奴裔

孫歸魏也丙殿因賜氏焉

緱氏有二周卿士食采之邑以邑為氏又渴侯氏改為緱氏

薦氏有二遠章之後亦作薦以邑為氏晉士薦之後以字為氏

孫氏有三衛公子惠孫之後以字為氏又楚為芊姓之孫齊有媯姓之孫皆以字為氏

續氏有二晉大夫狐鞠居食采於續故謂之續又舜七友續牙之後

南氏有三衛公子郢字子南其後爲南氏又楚有子
南氏亦爲南氏竝以字爲氏晉有南氏以鄉爲氏
國氏有二鄭子國之後以字爲氏姬姓也齊有國氏
姜姓也

孔氏有三宋孔父嘉之後也仲尼父嘉六世孫又衛
有孔氏爲世卿鄭亦有孔氏皆以字爲氏者

東陵氏有二東陵侯邵平子孫代焉又齊景公時有
隱居東陵因以爲氏

董氏有二董父之後以字爲氏又有陸終之子參胡

姓董以姓爲氏

費氏有二夏禹之後封費邑以邑爲氏又費廉氏改
爲費氏

成氏有二楚若敖之後以字爲氏又周有成氏

孟氏有二魯慶父之後爲孟氏又衛公子孟縶之後亦
爲孟氏

仲氏有二魯慶父曰共仲之後爲仲氏又宋莊公之
子子仲之後亦爲仲氏

祁氏有三晉獻公孫英食采于祁遂以爲氏又隰叔

之後又黃帝後

叔氏有四魯叔牙之後魯文公之子叔矜之後八凱叔達之後竝以叔為氏

步氏有二姬姓晉公族郟氏之後又步陸氏改為步氏

季氏有二魯公子季友之後也又陸終之子季連亦為季氏

伯氏有二晉中行伯之後也或言伯益之後亦為伯氏

士氏有二隰叔為晉士師以官為氏又有士季氏之後以字為氏

渠丘氏有二莒國之君居于渠丘故謂之渠丘又漢彭城王之後亦為渠丘

王氏有四有姬姓之王有媯姓之王有子姓之王有虜姓之王二族姬姓之王媯姓之王有一族子姓之王有一族虜姓之王有四族

任氏有三黃帝二十五子得姓為任者其後以姓為氏又顓帝少子陽封於任其後以國為氏又任為風

姓之國太昊之後也亦以國爲氏

諸葛氏有二葛伯之後居諸縣謂之諸葛又有熊氏之後爲詹葛氏齊人語訛以詹葛爲諸葛

偃氏有二有偃氏之國後爲偃氏又臯陶之後姓偃亦以姓爲氏

宣氏有二魯叔孫僑如諡宣伯與宋宣公之後並以諡爲氏

稷氏有二后稷之後有稷氏漢稷嗣君叔孫通支孫亦爲稷氏

溫氏有二唐叔虞之後封溫以封爲氏又溫恩氏改爲溫氏

楊氏有六唐叔虞之後封楊以封爲氏又周宣王子尚父封後爲氏又周景王之後又晉之公族楊食邑於羊舌凡三縣一曰揚氏又楊突周賜姓獨孤氏隋復本姓又有莫胡胡盧氏改爲楊氏

州氏有二晉州綽州賓之後又淳于氏謂之州公其後亦爲州氏

鄂氏有二晉鄂侯之後又巴郡七姓鄂其一也

元氏有五衛大夫元咺之後食邑於元以邑爲氏又拓跋氏云黃帝子昌意之後至魏文帝更爲元氏又紇骨氏改爲元氏又有是云氏改爲元氏又有景氏改爲元氏

常氏有二衛康叔支孫食邑於常因以爲氏又黃帝臣常先之後

京氏有二鄭武公少子改封於京以邑爲氏又李氏改爲京氏

盧氏有六齊太公之後食采於盧以邑爲氏又有盧

葛氏出自桓公亦爲盧氏又河南官氏志有莫盧氏改爲盧又有范陽雷氏聲近改爲盧又有三原閻氏改爲盧氏又章仇大翼隋煬帝賜姓盧氏

鮑氏有三夏禹之後食采于鮑以邑爲氏又俟力氏改爲鮑義侯力代氏亦爲鮑

屈氏有二屈瑕食邑於屈以邑爲氏又屈突氏改爲屈氏

陰氏有三夷吾六代孫爲陰大夫以邑爲氏又陰康代之後又後周賜姓丘曰陰氏

鹿氏有二趙大夫食菜五鹿因氏又阿鹿元氏改爲鹿氏

裴氏有三伯益之後封裴鄉以鄉爲氏又晉平公封顓帝孫於裴中號裴君子孫以爲氏又唐開元右驍衛大將軍疎勒王裴夷健之後

陸氏有三田敬仲之後封平原陸鄉以鄉爲氏又代北有部落大人號步陸孤氏後魏孝文遷洛陽改爲陸氏

麋氏有二楚大夫受封於南陽麋亭以亭爲氏又工

尹麋之後以名爲氏

嵇氏有二夏少康封子季舒於會稽遂爲稽氏漢初改爲嵇氏又統嵇氏改爲嵇氏

關氏有二風俗通云關令尹喜之後又云夏大夫關龍逢之後

丘氏有三太公都營丘支庶以地爲氏又有丘林氏丘敦氏竝改爲丘氏

艾氏有二大夫艾孔之後又河南官氏志艾斤改爲艾氏

申屠氏有二申侯之後居安定屠原以地爲氏又申徒氏隨音改爲申屠氏

門氏有四周禮公卿之子入王端門教以六藝謂之門子其後爲氏又河南官氏志有叱門氏改爲門氏又有吐門氏改爲門氏又有庫門氏改爲門氏

姜氏有二炎帝生於姜水因生爲姓其後太公封於齊子孫以國爲氏或以姓爲氏又桓廷昌上元中淮制改爲姜氏

無婁氏有二莒子無婁之後又無婁先生之後亦爲

氏

姒氏有二伯鯨之姓又官氏志姒亦改爲似又渴侯氏改爲姒氏

漆氏有三郟瞞之國姓漆又爲氏又漆室女之後又漆雕開後亦單爲漆氏

林氏有三周平王庶子林開之後因以爲氏又比干子堅逃長林遂爲氏義丘林氏改爲林

家氏有二家父之後以字爲氏又魯有子家氏亦爲家氏

吉氏有二尹吉甫之後又姞氏改爲吉氏

奇氏有二伯奇之後以王父字爲氏又河南官氏志

奇斤氏改爲奇氏

胥氏有二晉大夫胥恒之後以字爲氏又赫胥氏之

後亦爲胥氏

石氏有二靖伯之孫石蜡有功於衛世爲衛大夫其

後以字爲氏又烏石蘭氏改爲石氏

靈氏有三宋大夫子靈之後又文公之子公子圍龜

字子靈以字爲氏又齊靈公之後皆以字爲氏

乙氏有二商湯字天乙支孫因以王父字爲氏又河

南官氏志乙弗氏改爲乙氏

賀氏有三卽慶氏也漢慶質避諱旣爲賀氏又賀蘭

氏賀賴氏竝改爲賀氏

顏氏有二邾夷父字顏公子孫以爲氏又王儉譜云

顏氏出自魯侯伯禽支庶食采顏邑因氏焉

潘氏有二楚之公族以字爲氏又破多羅氏改姓潘

氏

昊氏有二昊英氏之後一云少昊之後

甲氏有二太甲之後又鄭大夫石甲之後

龍氏有二舜臣龍爲納言以名爲氏又董父巴姓以能畜龍故賜氏爲豢龍氏子孫以爲氏

輿氏有二周大夫伯輿之後以王父字爲氏又莫輿氏改爲輿氏

晁氏有二周景王子王子朝之後又衛大夫史晁之後

狐氏有二周平王之子王子狐之後以名爲氏又唐叔之後世爲晉卿

萬氏有三畢萬之後以名爲氏又芮伯萬之後又吐萬改萬氏

蘭氏有三鄭穆公名蘭以王父名爲氏又南甸奴四姓有蘭氏又河南官氏志烏蘭氏改爲蘭氏

高氏有四公子高之後以名爲氏又惠公之子析字子高亦爲高氏又高麗羽真氏改爲高氏又是婁氏改爲高氏

駱氏有二齊太公之後公子駱以名爲氏又地駱按氏改爲駱氏

奚氏有二奚仲之後又薄奚氏改爲奚氏

督氏有二宋大夫華督父之後以名爲氏又巴郡蠻

酋有督氏

和氏有二義和之後以名爲氏又後魏素和氏改爲

和氏

由氏有二由余相秦子孫氏焉又楚王孫由丹亦爲

由氏

渾氏有三渾良夫之後又官氏志吐谷渾氏改爲渾

又唐表渾氏出自匈奴渾邪王隋拓跋氏徙河南因

以爲氏

狼氏有二晉大夫狼曠之後又官氏志叱奴氏改爲

狼氏

顛氏有二晉大夫顛頡之後又周太顛之後

柯氏有二吳公子柯盧之後又河南官氏志柯拔氏

改爲柯氏

苟氏有二黃帝之後有苟實苟參或以河內多苟杞

因以爲氏又若干氏改爲苟氏

古氏有二古公亶父之後又吐奚氏改爲古氏

左氏有二齊公族有左右公子因以為氏楚有左史官亦為左氏

單氏丹音有三可丹氏改為單氏又阿單氏渴單氏俱改為單氏

雲氏有二縉雲氏之後又連宥氏改為雲氏

烏氏有三少昊氏以烏鳥名官以世功命氏又唐表言烏餘之裔又烏石蘭改為烏氏

史氏有二周大夫史佚之後以官為氏又有阿史那氏改為史氏

山氏有三周山師掌山林之官以官為氏又烈山之後又吐難氏改為山氏

寇氏有三周蘇忿生為司寇子孫以官為氏又衛康叔為周司寇支孫以官為氏又後魏改四引氏為寇氏

宗氏有二周大夫宗伯之後以官命氏又楚少子宗家於南陽以王父字為氏

衡氏有二伊尹為湯阿衡子孫以衡為氏又魯公子衡之後以王父字為氏又袁氏改為衡氏

阿氏有三伊尹爲阿衡支孫以官爲氏又河南官氏志阿伏氏及阿賀氏竝改爲阿氏

庫氏有二漢倉氏庫氏以官爲氏又官氏志庫偃官氏改爲庫氏

僕氏有二周禮僕人之後又河南官氏志僕蘭氏改爲僕氏

皇氏有二三皇之後因氏焉又世本云皇甫克石之後以字爲氏

侯氏有二魯侯縉之後子孫適他國稱侯氏以爵爲

氏又夏后氏之裔又古列氏改爲侯氏

陶氏有三陶唐氏之後因氏焉又虞思爲周陶正亦爲陶氏又左傳商人七族有陶

卜氏有二周禮卜人氏又須卜氏改爲卜氏

竇氏有二少康之後逃出自竇而少支孫以竇爲氏又鮮卑賜姓訖豆陵氏後魏孝文改爲竇氏

車氏有二田千秋號車丞相子孫氏焉又後魏疎屬曰車裊氏改爲車氏

桓氏有二齊桓公之後以諡爲氏又宋桓公之後向

黽亦為桓氏又烏丸氏改桓氏

穆氏有二宋穆公之後以諡為氏又有丘穆陵氏改為穆氏

宣氏有二叔孫僑諡宣伯以諡為氏又宋宣公之後靖氏有二單靖公之後以諡為氏又齊田氏之族靖郭君之後

公孫氏有二春秋時諸侯之孫亦以為氏者曰公孫氏又黃帝姓公孫因亦以為氏

利氏有二楚公子食采於利後以為氏又官氏志叱

利氏改為利氏

木氏有二端木賜之後避仇改為木氏又百濟八姓其五曰木氏

賜氏第二

周穆王使造父攻徐偃王破之乃賜以趙國由此為趙氏

婁氏漢婁敬勸高帝都長安封為奉春君賜姓劉氏項氏漢賜劉氏後周賜辛氏

酈食其曾孫漢賜以食其為氏玄孫武平帝時為侍

中復改侍其

漢金日磾七世內侍本以休屠作金人祭天故賜為金氏

晉州稽胡晉初賜呼延氏

獨孤屯本姓李從齊神武沙苑戰敗為柱國獨孤信所擒配為士伍賜獨孤氏

高獲自高麗歸魏周賜姓獨孤氏

章仇秃髮氏歸後魏太武賜源氏

後周蔡祐字承先陳留圉人有膂力善騎射太祖以

其戰功賜姓大利稽氏

三國典畧

范陽董秦大曆賜姓李氏

章仇大翼善天文隋煬帝賜盧氏

唐李勣本姓徐後賜姓李封英國公又李抱玉本姓

安名重璋元宗以其戰河西有功改名賜姓李

王簡為鎮小將鎮州軍亂殺田弘正穆宗為之旰食

召簡問計簡極言利害願自效明年拜橫海節度使

賜姓李氏名全畧

唐遊藝賜武氏

唐邴氏以元紘杜氏以伏威胡氏以大恩弘氏以播
郭氏以子和麻氏以延昌鮮于氏以叔明安氏以元
諒張氏以寶臣阿希布氏以懷孫跌氏以光進舍利
氏以奉國董氏以忠臣羅氏以德雋以藝朱邪氏以
國昌竝由立功賜李氏從國氏也

宋李繼俸賜名趙保忠李繼遷賜名趙保吉後叛宋
改本姓

本朝太祖有義子數人如李曹國文忠沐西平英都
督何文輝徐國馬等皆賜朱姓正德五年義子武德

一姓

七年都督錢寧錢安許國賜朱姓又賜都督朱

福朱綱都指揮朱春朱翥朱增朱斌朱政朱海朱岳
朱昇朱晟朱彪朱鏞朱鈇指揮朱欽等千百戶鎮撫
旗舍朱欽等百二十人姓十二年賜舍人朱山朱準
朱容朱淮朱渭朱欽朱義朱大爵朱印朱珂姓俱錦
衣衛食糧尋詔都督江彬許秦劉暉張洪神周李
琮指揮焦睿俱賜朱姓又改指揮楊瑄曰璋焦春曰
棕桂曰松張天祐曰海廷鸞曰璧俱朱姓
太宗時賜降虜姓名都督丑驢曰李賢忠勇王也先

土干曰金忠安順侯脫火赤曰薛貴清平侯買驢曰
吳成忠勇伯把台曰蔣信都督把都帖木也曰吳允
誠論都兒灰曰柴秉誠把敦杭曰吳守義都指揮僉
事把住曰楊效誠朵兒只曰馬惟良鐵住曰柴克恭
行都指揮同知滿宋兒灰曰柴志誠都指揮僉事阿
兒刺台曰楊汝誠指揮伯帖木兒也曰柴志敬指揮
同知猛歌曰安汝敬僉事脫脫曰楊必敬只蘭曰吳
克誠朵列子曰吳存敬失火答曰韓以謙祖住不花
曰柴永謙

改氏第三

段氏于木之子隱如入關于字改為段氏

漢車千秋本齊田氏千秋以年老得乘小車出入省

中時人謂之車丞相子孫遂為車氏

嵇康本奚氏後康易而為嵇

漢訾順本姓祭以為不祥改為訾

晉元達字長宏本姓喬以生日妨父故改為陳

唐源乾曜本秃髮偃檀之子賀入後魏魏太祖謂之

曰與卿同源可為源氏乾曜其後也

赫連勃曰朕之皇祖自北遷幽朔姓改妣氏音殊中國故後從母氏為劉子從母姓非義也朕將以義易之帝王者繫天為子今改姓曰赫連氏庶協皇天之意其非正統皆以鐵伐為氏庶朕宗族子孫剛銳如鐵皆伐人三十國春秋

康居王姓溫月氏先居張掖祁連山北昭武城為突厥所破南依蔥嶺遂有其地枝庶皆改姓昭武示不忘本也唐書

尚可孤宇文之別種也代居松漠之間上元中歸順

累遷左右威畏二大將軍

魚朝恩後禁軍愛其勇力甚委遇之奏改姓魚氏唐書

桓庭昌唐上元准制改為姜

暨佐時唐上元准制改為周

媯氏改為姚氏 袁氏改為衡氏

裴氏改為壘氏 媯氏改為吉氏

羊舌氏改為吉氏 媯氏改為羊氏

閻氏改為盧氏 計然本辛氏改為計氏

姒氏改為似氏 稽氏改為嵇氏

求氏改為裘氏

景氏改為元氏

育氏改為封氏

氏氏孔融譙氏儀以氏字民無上改為是氏

是光改為齊氏

梁鴻氏改為運期氏

馬矢氏改為馬官氏

魏全琮孫暉食封白水改為泉氏

渾沌氏改屯氏去水

屈全之裔孫仕後魏以自南方乃加南或作男

謝服為鴻臚卿後漢末出征嫌其名姓不祥乃改為

射咸

京房本姓李吹律定姓改為京氏

劉遵考以忠諫比伍員改為員猶有源流可攷逃難

山谷強氏曰潛遂失本姓一姓改為數姓者如炁橫

四子守墳墓者為炁居徐者為吞居幽者為桂居華

陰者為快此四姓同一炁也

勾姓本避高宗諱勾濤則仍字更音鈞光祖則加金

約紡則加絲諶則加草句思則加易字勾龍如淵則

加龍此六姓同一勾也

本朝洪武初改元南臺大夫福壽子為陳鑄歷太僕寺少卿

改惡氏第四

蕭氏齊武帝以巴東王子響叛逆改為蛸氏

馬氏以何羅逆誅馬后惡之改為莽氏

唐則天時琅琊王冲據博州起兵冲父豫州刺史越

王貞又舉兵於豫州與相應討平之改姓為虺氏

梟氏隋煬帝誅楊玄感改為梟氏

勃氏梁武帝改豫章王綜為勃氏

黥氏淮南王英布少時以罪被黥遂為黥氏

蝮氏唐乾封元年改武惟良為蝮氏

吳孫皓以孫秀奔魏改為厲氏

劉誕謀逆貶為留民

唐高宗廢后王氏及良娣為武后所殺改后姓為蟒

良娣為梟

帝王姓系第五

堯姓祁其後為唐為劉為韋為范為士為尹為豕韋

唐杜舜姓堯其後為媯又為陳為田為穰為威為法

為王為袁為轅為占為息為陸為司馬為胡母為顓
 孫子獻子鞅子芒子尚子禽子輿子寤子沮子夏子
 宋第二第五第八禹姓姒其後為夏為啓又為杞為
 菑為夏侯為於越為獯鬻湯姓子其後為商為殷為
 湯為甲為沃為槐又為宋為箕為正為祿為乙為奭
 為微為衍為華為孔為靈為邊為向為合為牛為樂
 為皇甫為事父武王姓姬其先為稷為鞠其後為管
 為周為林為忌為祭為謀為毛為邢為胙為茅為樊
 為甘為王為原為邱為霍為朝為狐為謝為丘為明

為郚為雍又為魯為臧為邱為孟為叔為季為展為
 柳為施為衆為家為士為孟孫為叔孫為季孫為臧
 孫為瑕丘為公父為公之為公石為少施為子服為
 子陽為子家為王父為子揚為子孟為子我為子仲
 為意如為南又為晉為邗為應為韓為欒為郤為苦
 為溫為祁為犍為曲為步為荀為別為中行為智為
 輔為續為羊舌為叔向為樓季為大戊為大圻為梁
 其為夷吾又為衛為甯為元為常為汲為孫為彌為
 析為右為南為輒為兼為子郢為王孫為賈孫為公

析又為畢為原為酆為郇為馮為魏又南蔡又為吳
 為壽為季為慶忌為延陵又為鄭為段為游為國為
 駟為印為罕為良為羽為豐為蘭為然為伯有為子
 豐為子然為去疾為東里又為虞又為曹又為滕又
 為號又為召為燕又為韓為橫為蘭為龐為閻為梁
 垣為董明為子臧

齊姜姓亦呂其後為隰為望為尚為桓為懿為厲為
 孝為崔為慶為賀為盧為棠為檀為丘為高為柴為
 駱為左為將具為子旗為子乾為子工為子泉為子

襄為子雅為子尾為大陸為雍門為東郭為於陵又
 為許三苗

楚芊姓其後為鬻為熊為成為鬪為班為潘為囊為
 孫為昭為屈為景為俞豆為若敖為伯比為子西為
 子庚為子趙為子期

秦嬴姓其後為衙為李為裴為桑為繆為樗里為飛
 廉為高陵其別為莒為葛為趙為馬為主父為叔帶
 此僅一帝三王五伯之後其他可以類推矣後世之
 議婚者寧能不相犯也

五帝三王自黃帝至舜禹皆同姓而異其國號以章明德故黃帝為有熊顓帝為高陽帝嚳為高辛帝堯為陶唐帝舜為有虞禹為夏后而別姓姒氏契為商姓子氏稷為周姓姬氏史舜紀

氏族博攷卷之三

氏族博攷卷之三

吳興 凌迪知稚哲 纂
同郡 吳 京朝卿 校

氏攷 中

漢魏受氏第六

按成周以國命氏漢則稱郡國者亦有之

楚元王交之子劉富初封休侯更封紅侯其後遂為紅氏

楚懷王孫心都柳其後遂為柳氏音婆氏因吳芮封

番君支孫氏焉櫟陽氏後漢景丹封櫟陽侯曾孫分
避亂隴西因封爲氏周陽氏漢淮南王舅趙兼封周
陽侯子由爲河東尉因封爲氏東陵氏因邵平之封
子孫遂以爲氏廣武氏因李左車之封子孫遂以爲
氏冠軍氏者因霍去病之封也信都氏者因張敖之
封也武彊氏者因後漢王梁之封也鄆氏者姓苑云
鄆春侯之後鄆氏者姓纂云越人以郡爲姓今明州
鄆縣是也如此之類是爲以郡命氏者也
春秋之時冀芮居冀地類考叔居潁谷介之推燭之

武竝以地命氏者漢四皓亦然如綺里季居於綺里
也其後有綺氏亦有綺里氏角里先生居於角里也
其後有角氏亦有角里氏少康之後漢初徙居嵇山
遂爲嵇氏後漢鮭陽鴻爲少府居鮭陽遂爲鮭音圭氏
如此之類漢亦多矣是爲以地命氏者也

成周以邑命氏漢魏亦有之揭陽氏者因漢功臣安
道侯揭陽定爲揭縣令因氏爲泉氏因全琮之孫暉
魏封南陽侯食封白水改爲泉氏如此之類是爲以
邑命氏者也

三代之時貴者有氏賤者有名無氏按漢郊祀志汾
陰人無錦粵人勇之是亦有名無氏者蓋錦爲工技
之賤勇之爲蠻夷之賤也

按亡氏之賤漢亦有之受氏之道漢魏有傳略載一
二以備考古漢魏之後無所聞惟用古姓氏耳

變夷第七

賀魯之爲周	賀葛之爲葛	是婁之爲高
叱盧之爲祝	口引之爲冠	如稽之爲緩
去斤之爲艾	是賁之爲封	叱奴之爲依

吐難之爲山	古引之爲侯	出連之爲畢
乞扶之爲扶	那婁之爲婁	是連之爲連
俟畿之爲俟	可單之爲單	紇骨之爲骨
沓盧之爲沓	莫千之爲郤	屈突之爲屈
俟亥之爲亥	俟畿之爲畿	賀兒之爲兒
叱利之爲利	叱李之爲李	柯枝之爲柯
叱羅之爲羅	那莫之爲莫	莫輿之爲輿
費連之爲費	費羽之爲羽	黜弗之爲弗
莫盧之爲盧	爾綿之爲綿	解毗之爲解

奇斤之為奇 統萬之為萬 統嵇之為嵇

安遲之為安 輾遲之為展 秘邢之為邢

如羅之為如 薄奚之為古 若干之為苟

副呂之為副 那萋之為萋 綦連之為綦

咎盧之為咎 姒先之為姒 渴侯之為紙

烏蘭之為蘭 薄奚之為奚 幸和之為和

拔略之為蘇 紇干之為干 乙弗之為乙

渴侯之為緱 渴侯之為似 丘林之為林

步鹿之為步 屋引之為房 車焜之為車

牒云之為云 素嵇之為黎 達勃之為藜

普周之為周 高護之為李 叱于之為薛

莪眷之為莪又為眷 莫蘆之為蘆或為盧

丘林之為林又為丘 丘敦亦為丘

副呂之為副又為呂 叱丘亦為呂

就賴之為就 菟賴亦為就

温狐之為温 温盆亦為温

阿伏之為阿 阿賀亦為阿

紇單之為紇 紇奚亦為紇

羽真之為高楚婁亦為高

是云之為是是奴亦為是

蓋婁之為婁疋婁亦為婁

俟力之為鮑俟力代亦為鮑

烏丸之為桓阿鹿桓亦為桓

可地之為延可地延亦為延

俟奴之為俟俟伏斤亦為俟

費羽之為羽拂羽亦為羽

黜弗之為弗燕弗亦為弗鐵弗亦為弗

吐門之為門叱門亦為門庫門亦為門

拓跋之為元紇骨亦為元是云亦為元景氏亦為元

阿單之為單渴單亦為單

悉雲之為雲宥連亦為雲

賀蘭之為賀賴氏亦為賀

右二字變夷

吐谷渾之為渾

俟呂隣之為呂

沒鹿回之為竇紇豆陵亦為竇

萬紐于之為于勿忸于亦為于

斛瑟羅之為羅破多羅亦為羅

温石蘭之為石烏石蘭亦為石又為烏

步六孤之為陸 丘穆陵之為穆

阿伏干之為阿 普陋茹之為茹

拔列蘭之為梁 烏落蘭之為蘭

宿六斤之為宿 庫若干之為干

扈地干之為扈 俟伏斤之為斤

地駱拔之為駱 郁原甄之為甄

若口引之為冠 破多羅之為潘

破落那之為那 步鹿如之為鹿

阿史那之為史 沒路真之為路

譬曆辰之為辰 紇突隣之為隣

骨咄祿之為祿 大利稽之為部

俟力代之為俟 大洛稽之為稽

俟伏斤之為伏 壹斗眷之為明

步鹿斤之為步 獨孤渾之為杜

樹洛干之為樹 庫褥官之為庫

奚什盧之為盧 莫胡盧之為陽

比方推考 卷三
渴燭渾之爲朱

右三字變夷

按代北之人隨後魏遷河南者後魏獻帝爲之定姓
爲複姓或爲三字姓或爲四字姓其音多似西域梵
書有二合三合四合者皆指一字之音故孝文用夏
變夷華以華俗皆改爲單字之姓又孝文詔南遷者
死不得還卽葬洛陽故虜姓皆在河南又按其書曰
河南官氏志者蓋優代北之人隨後魏南遷因作其
書而爲之志又按孝文之時咸改單姓惟賀若氏不

改及乙旃氏改爲叔孫拔枝氏改爲長孫

變於夷第八

閻慶之爲大野氏 辛威之爲普屯氏

韓裒之爲侯呂隣氏 李弼之爲徒何氏

田弘之爲紇干氏 王雄之爲可頻氏

王熊之爲柘王氏 蔡氏之爲大利稽氏

陰氏之爲丘目陵氏 張氏之爲叱羅氏

侯氏之爲侯伏氏又爲賀屯氏

周氏之爲車非氏 南氏之爲宇文氏

按後周宇文氏以其起於夷虜故欲變夏爲夷以夷爲貴也然官制一遵三代而姓氏用夷虜何相反之如是

別族第九

魯季氏自季孫行父以至季孫彊大宗也故稱季孫如季公鳥季子差季寤之類但稱季者所以別支庶叔氏之大宗亦稱叔孫其支庶稱叔仲氏又曰仲壬孟丙亦是也

仲氏之大宗亦稱仲孫氏其支庶則稱南宮氏南氏

子服氏

臧氏之大宗稱臧氏至於臧會氏臧文氏皆支庶之別系其所自出之祖

伏宓同出伏羲氏異文者其後之人以別族也

傅餘氏者傅氏餘子之族也

韓餘氏者韓氏餘子之族也

褐餘氏者褐冠氏餘子之族也

成湯之後爲殷氏又有北殷氏

后稷之後爲周氏又有西周氏又有周生氏

舒氏之族見於當時者一曰舒二曰羣舒三曰舒蓼
四曰舒庸五曰舒鳩六曰舒鮑

斟氏之族見於當時者一曰斟二曰斟鄩三曰斟灌
四曰斟戈五曰介斟

荀氏之族見於後世者有田氏有程氏有輔氏有智
氏

田氏之族見於後世者有第二有第五有第八

顓臾之族三有顓臾有去臾為顓有去顓為臾

密須之族三有密須有去須為密有去密為須

葛氏居於諸邑者為諸葛

里氏居於相城者為相里

目夷氏宋公子目夷字子魚又有魚氏魚孫氏皆所
以別族

避諱第十

宋以武公名司空改為司功氏

晉以僖侯名司徒改為司城氏

籍氏出安定避項羽諱改為席氏

奭氏避漢元帝諱改為盛氏

莊氏避漢明帝諱改為嚴氏

慶氏避後漢侍中慶純安帝父諱改為賀氏

師氏避晉景帝諱改為帥氏

姬氏避唐明皇諱改為周氏

弘氏避唐明皇諱改為洪氏

淳于氏避唐憲宗諱改為于氏

啖氏避唐武宗諱改為澹氏

恒氏避宋諱改為常氏

閩人避丑審知諱沈氏去水而為尤氏

文潞公本姓敬其曾大父避石晉高祖諱更姓文至漢復姓敬入宋避翼祖諱又更姓文

音訛第十一

陳氏為田氏 韓氏為何氏 黨氏為掌氏

歐氏為區氏 戴氏為載氏 蠻氏為瞞氏

號氏為郭氏 呂氏為甫氏 郊氏為談氏

妣氏為似氏 苦氏為庫氏 雷氏為盧氏

恭氏為共氏 共氏為洪氏

王孫賈之後亦為古孫氏者賈近亦古故也

苦成子以成子食苦邑故以為氏後訛為古成又為庫成

慕容氏為慕輿氏

賀遂氏為賀悅氏

夫餘氏為鳧史氏

吾丘氏為虞丘氏

母丘氏為曼丘氏

申徒氏為申屠氏

申屠氏古者申信音同為信都氏

鄆氏為繒氏

穆氏為繆氏

瞻葛氏為諸葛氏

簡雍本姓耿幽州人以耿為簡遂為簡氏

南中多危姓有忘其稱者或改為元

郭林宗其先出自周王季建國命氏訛謂之郭

魏初莫護跋率部落入居西遼時燕代多冠步搖

部因謂之步搖後音訛為慕容且以為氏

唐辛替否本夏啓封支子於莘辛莘相近為辛氏

王莽嘗曰余黃虞之後也故號其女曰黃皇室主黃

王聲相近故俗稱王為黃

有因二音而訛者員音運俞救救反葉音攝今從正

音甄音堅宣和唱名以堅呼之不應訛為真矣

省文第十二

鄆之為章 邴之為丙 邾之為來 鄆之為專

鄆之為尋 邵之為召 邱之為后 鄆之為會

鄆之為禹 邳之為云 鄆之為曾 邾之為兒

邾之為朱 邾之為成 邾之為甸俱去邑

幕之為莫去中 橋之為喬去木 理之為里去王 譚之為去

熊之為能去火

省言第十三

盧蒲之為盧 閭丘之為閭 卽墨之為卽

鍾離之為鍾 馬服之為馬 褚師之為褚

毋丘之為毋 司寇之為寇 宗伯之為宗

褐冠之為冠 主父之為主 須句之為須

須句之為句

避仇第十四

端木賜之後改為木氏又改為沐氏

墨台之後改為墨氏又改為怡氏

刁氏之後改為刃 伍氏之後改為五

巴氏之後後漢巴原避董卓難改為杷氏

鞠氏之後改爲翹

譚氏之後改爲覃

仇氏之後改爲求

銅鞮氏之後改爲遼

馱邗氏之後改爲邗

滕氏之後改爲騰

秣氏之後改爲末

陸氏之後改爲禱

郃氏之後改爲浩

槩氏之後改爲既

胙氏之後改爲作

杞氏之後改爲枹

彤氏之後改爲彤

樓氏之後改爲蓋

薛氏之後改爲蘖

棘氏之後改爲棗

景氏之後改爲翠

凡氏之後改爲汎

鮮卑氏之後改爲庫狄

共氏之後改爲洪

圜氏去曰改爲卷氏

章氏避仇爲仇章氏

竺晏本姓竹避仇加二改竺氏

踈氏避王莽之難去足爲束氏又云踈廣之曾孫彥

避王莽於太原改爲太傅

姚氏田恢避莽難改爲媯氏五代孫敷復爲姚氏

牛金之子避難改爲牢又改奈後復爲牛氏

慕容氏破後種類仍繁懼誅不敢復姓皆以興爲氏

按避仇之說多非或省文或訛音何必爲避仇也據

皇南謚云凡氏遭秦亂避地添水爲汎氏此何所憑
哉凡氏者凡伯之後以國爲氏汎者周之邑也其大
夫食邑於此其後之人以邑爲氏自是兩家源流應
知避地改姓之說多附會然踈廣之後爲束爲太傅
牛金之後爲牢爲奈此又爲避地之事明矣

生而有文第十五

武氏唐元和姓纂云周平王少子生而有文在手曰
武遂以爲氏

鞠氏后稷之孫生而有文在手曰鞠因以爲氏

南氏姓源韻譜云盤庚妃姜氏夢龍入懷孕十二月
而生手把南字長封荊州號南赤龍

鮮于氏鮮于血脉譜云子他之子曰文生而有文在
手左曰魚右曰羊及長封漁陽爲燕附庸

閻氏唐表云昭王少子生而有文在其手曰閻康王
封於閻城按左氏謂季友生而有文在其手曰友因
以命之每疑其誕也後人由此復廣其道焉且武者
以諡爲氏南氏者以字爲氏鮮于者武王封箕子於
朝鮮支子仲食采於于故有鮮于氏閻氏者武王封

太伯曾孫仲奕於閩鄉故有閩氏安得無稽之言流於後世大抵氏族之家言多虛誕博雅君子不可不審

以物為姓第十六

伯陽生於李樹下遂拾李樹為姓

馬援其先趙奢為趙將能馭馬號馬服君子孫因以為氏

第五倫其先齊諸田徙園陵多以次第為氏

陸羽不知所生或言有僧得之水濱畜之既長以易

曰筮得蹇之漸曰鴻漸于陸其羽可用為儀遂以陸

為氏羽為名而字以鴻漸

漢有成功恢禹因禹治水成功而少子遂以為姓

有投壺氏因中行穆子相吾侯投壺而生子因以為姓

子產稱鄉校為師遂曰校師氏

趙衰以冬日可愛曰冬日氏

伊尹生空桑曰空桑氏

微子乘馬入周曰白馬氏

飯氏三飯繚之後

卷三

氏族博攷卷之四

吳興 凌迪知稚哲 纂

同郡 吳 京朝卿 校

氏攷 下

復姓第一

李叔明本姓嚴少孤養外家冒鮮于姓請還宗詔可
叔明初不知意醜之乞宗姓列屬籍代宗從之

宋范仲淹少孤隨母改適朱氏遂冒姓朱後歸范姓
本朝曹國公李文忠初 賜國姓後改李姓

西平侯沐英初 賜國姓後改沐姓

平章何文輝初 賜國姓後改何姓

東勝侯汪興祖初張姓 都督僉事謝彥初孫姓

右都督寧正初韋姓

黃觀初從父贅姓許幼穎敏受學元黃得得歿節觀

益砥礪洪武二十四年會試禮部第一 廷對擢進

士第一受官翰林復黃姓累陞尚寶卿禮部右侍郎

建文君改侍中掌尚寶司事與方齊並見信用

文皇帝索齊黃時觀草詔極其詆斥建文四年觀奉

詔募兵上游且督諸郡勤王至安慶聞變痛哭自分
大事已去乃朝服東向再拜於羅刹磯湍急處投水
而歿 詔籍其家

陳彥回父被誣論歿彥回謫戍滇南未入滇家人多
道歿比至蜀惟彥回與祖母郭存會赦又弗原監送
者憐而縱之去顧貧不能歸住依定遠知縣黃積良
稱黃姓未幾被薦為保寧府學訓導建文初薦陞徽
州知府是冬郭氏子承重徽父老乞走京留會彥回
衰經赴 闕疏乞得復陳姓彥回恒以亡命冒宗為

氏族博考 卷四 二
愧悒悒不自安屢欲陳首輒自籌曰祖母年高卽蹉
跌奈何隱忍二十餘年始得行其志靖難兵至江上
彥回糾義勇勤王

文皇卽位至京歿之籍其家

東里楊先生世爲儒家一歲而孤母改適羅公理時
舉進士爲德安府同知以其家行歲時祀先祠恒命
諸子倍禮公獨不見命時尚六歲以問母母泣而語
之因慟日益感發七歲私竊磚土倣作神主于外別
室祀其三世每旦入焚香謁拜出入扃鑰秘無知者

旣久左右覘知以告德安公旦視先生入謁與母宜
人從戶外竊窺之見其進退拜伏皆感泣遂復姓
少保楊溥初吳姓

右都御史熊槩初胡姓

右副都御史陳泰初曹姓

太常卿夏昺初朱姓

工部尚書趙榮初王姓

南戶部尚書潘蕃初鍾姓

副都御史丘彙初周姓

尚書孟鳳左布政孟麟初臧姓

兵部尚書張經初蔡姓

天順庚辰狀元王一夔奏復謝姓

天順甲申會元吳鈇奏復陸姓

天順間章尚書恭懿倫身沒後子孫奏復吳姓

正德中魏太常文簡校身沒後子孫奏復李姓

嘉隆間御史沈鐸初邵姓

少傅大學士呂本初李姓

左布政汪尚寧初程姓

禮部尚書陸樹聲順天府丞陸樹德初林姓

侍講邢一鳳初林姓

大學士申時行初徐姓

都御史王一鶚初楊姓

大理評事王大學初孫姓

都御史廖逢節初楊姓

按察副使馬顧澤初顧姓

御史房寰初姚姓
按察副使景承芳初王姓

同姓名第二

氏族博雅 卷四
兩曾參有與曾子同姓名者而殺人人告曾子之母
母曰吾子不殺人織自若有頃焉人又曰曾參殺人
其母尚織自若也頃之又一人告之曰曾參殺人其
母懼投杼踰垣而走

兩毛遂野人毛遂墜井而死客以告平原君平原君
曰嗟乎天喪予矣既而知非平原客

兩子夏杜欽字子夏少好經書家富而目偏盲茂陵
杜鄴與欽同姓字俱以才能稱京師故衣冠謂欽爲
盲子夏以相別欽惡以疾見詆迺爲小冠高廣財二

寸由是京師更謂欽爲小冠杜子夏而鄴爲大冠杜
子夏云

兩孟公陳遵字孟公時列侯有與遵同姓字者每至
人問曰孟公坐中莫不震動既至而非因號其人曰
陳驚坐云

兩韓翊韓翊唐德宗時制誥闕人上批曰與韓翊時
有與翊同姓名者爲江淮刺史又具二人同進上復
批曰春城無處不開花寒食東風御柳斜與此韓翊
兩李益李益時又有太子庶子李益同在朝故世言

文章李益以辨云

本朝大臣姓名同

兩郭子興高皇帝舊帥除陽

三王真洪武都督僉事追封臨沂侯一永樂金鄉侯追封寧國公復有都督同知為遼東總兵

五張信洪武狀元侍讀一孝子尚寶卿一永樂隆平侯一宣德兵部左侍郎一弘治彭城伯

三吳良洪武江陰侯一正統都督同知

三李敏洪武工部尚書一景泰戶部尚書一成化戶部尚書

三李浩洪武刑部侍郎一景泰南工部右侍郎一成化禮部尚書

三張鳳洪武行中書省參政一天順戶部尚書一正德右副都御史

兩朱榮洪武一永樂俱都督 兩李素洪武御史中丞一洪熙副都御史

兩黃琛洪武駙馬都尉中都正留守一成化南戶部右侍郎

兩吳禎洪武靖海侯 兩劉寧洪武一成化俱都督

兩石璞洪武右侍郎一景泰太子太保兵部尚書

兩陳文洪武都督僉事東海孝勇侯一成化大學士莊靖公

兩李泰洪武戶部尚書一成化詹事府詹事兼學士

兩陳清洪武都督封合浦侯弘治南京戶部尚書

兩呂本洪武吏部尚書建文外大父懿文太子妃父也一即李本改姓

三李賢永樂忠勤伯一宣德豐城侯一成化少保大學士

三王佐 一永樂順昌伯 一正統戶部尚書 一正德南戶部尚書

兩金忠 俱永樂一兵部尚書贈少師 一太保封忠勇王

兩陳亨 俱永樂一右都督追封涇國公 一左都督追封成武公

兩張興 俱永樂靖難功臣 一都督僉事 一安鄉侯

兩蔣驥 一永樂禮部侍郎 一弘治定西侯 兩吳江 一永樂總兵 一弘治總兵

兩陳壽 一永樂工部左侍郎贈尚書 一正德南刑部尚書

兩李英 俱宣德一達官會 一寧伯 一都督同知 兩陳智 一宣德榮昌伯 一正統右都御史

兩劉昭 一宣德都督 一太子少保工部尚書 兩劉璉 一宣德戶部左侍郎 一成化太僕卿

兩張本 一宣德太子賓客兵部尚書 一弘治都察院右副都御史

兩顧佐 一宣德右都御史 一正德戶部尚書 兩張昇 俱正統一彭城伯 一禮部尚書

兩張瑾 一正統彭城伯 一景泰刑部侍郎 兩王通 一景泰都督同知 一弘治右都督

兩劉清 一景泰刑部侍郎 一景泰左副都御史 兩韓福 一正德戶部左侍郎 一景泰刑部左侍郎

兩李崇 一景泰刑部左侍郎 一隆慶南吏部右侍郎

兩趙榮 俱天順一忻城伯 一工部尚書

兩陸鈇 俱天順一科俱非正歲 一德辛巳 一科俱非正歲

兩李文 俱成化一高陽伯 一都督同知 兩李震 俱成化一興寧伯 一兵部左侍郎

兩吳琮 俱成化一廣義伯 一襲清寧伯 兩王信 俱成化俱都督同知

兩張鵬 俱成化一太子少保兵部尚書一都督僉事

兩吳節 俱成化一太常寺卿兼翰林院侍讀學士一都察院右副都御史

兩馬昂 成化一正德太子少保戶部尚書一正德左都督

兩李和 成化南戶部右侍郎一嘉靖附馬都尉

兩李瑾 成化太子大傅襄城侯一嘉靖征西將軍大同總兵

兩李本 成化南禮部尚書一嘉靖少傅大學士

四張泰 成化二人一正德一人一為名將一仕翰林修撰為名文人正德二人一以南右都為南戶部尚書一為總制右都御史俱贈太子少保

三張瓚 成化二人一戶部侍郎一襲封惠安伯嘉靖一人少保兵部尚書

三白玉 成化二人一右都督一都督僉事正德一人右都督

兩韓文 俱弘治俱字貫道一都察院右副都御史一戶部尚書

兩徐溥 俱弘治一永康侯一少師大學士

兩王道 弘治右副都御史一嘉靖吏部右侍郎

兩王憲 正德襲封靖遠伯一嘉靖太子太保兵部尚書

兩張縉 正德南戶部尚書一嘉靖都察院都御史

兩彭澤 俱嘉靖一少保兵部尚書一太常卿

兩陳儒 俱嘉靖一秦寧侯一都御史

兩胡松 俱嘉靖一工部尚書一吏部尚書

兩張岳 嘉靖一萬曆俱都御史

兩孫應奎 俱嘉靖一戶部尚書一都御史

兩吳山 俱嘉靖一刑部尚書一禮部尚書

大疾傳文

家而

言

兩趙錦

一嘉靖太子少保兵部尚書一萬曆南吏部尚書

兩李春芳

俱嘉靖一丁未廷試第一太傅吏部尚書一癸丑進士吏科給事中

三李際春

一嘉靖通政司通政一隆慶戶部主事一萬曆初任知縣

兩陳瓚

俱隆慶三年一左都御史一太常少卿

隱姓名第三

晨門

子路宿於石門晨門曰奚自

丈人

子路從而後遇丈人以杖荷蓀

荷蕢

子擊磬於衛有荷蕢而過孔氏之門者

屠羊

屠羊隱名楚王延三旌之位

牽狗

武帝東巡至海上羣臣言見一老父牽狗言我欲見

鉅公已忽不見

負琴者

文中子講道於白牛之溪弟子奉書北面環堂成列

講罷程生退省於松下語及周易薛收嘆曰不及後
義氏乎何辭之多也俄而有負苓者皤皤然倚松而
見曰吾子何嘆也薛生曰叟何為者而徵吾嘆負苓
者曰云云負其苓而行追問之居與名不答文中子
聞之曰隱者也

籬桶者

二程侍父入蜀至大慈寺有籬桶者口吟易數就揖
之輒歸質所疑酬答如響問其姓名不答徑去

麻衣道者

不著姓名有易解行于世號道者易

海翁

海翁忘機

塞翁

塞翁失馬

鹿皮翁

翁機巧舉手能為器械後山居焉

瞿研先生

逸姓氏太和末居宣城之脊山山中有瞿研因以為

號桓温嘗造之見先生披鹿裘坐石室神色無忤温
及僚佐數十人莫測乃命伏滔爲之銘贊終隱於山
中

野王二老

光武遣鄧禹西征送之於道既返因於野王獵路見
二老者卽禽光武問曰禽何向竝舉手西指言此中
多虎大王勿往光武曰苟有其備虎亦何患二老曰
湯卽桀於鳴條而大城於亳武王卽紂於牧野而大
城於郊廓彼二王者備非不深也光武悟顧左右曰
此隱也將用之辭而去

絳縣老

絳縣人晉悼夫人食城杞者絳縣人或年長往與食
問之年曰臣不知紀年臣生歲正月甲子朔四百四
十有五甲子矣師曠曰七十三歲趙文子召之而謝
過焉曰武不才使吾子辱在泥塗久矣使助爲政辭
以老與之田使爲君復陶以爲絳縣師

陳留老父

桓帝時黨禍起士大夫有去官者相抱而泣老父過

之歎曰夫龍不隱鱗鳳不藏羽網羅高懸去將安所
雖泣何及乎衆欲與語不顧而去竟不知其名

四皓

東園公綺里季夏黃公角里先生避秦不仕隱居商
洛山中漢高帝欲易太子張良畫計以書幣請至為
太子客鬚眉皓白衣冠甚偉帝恠問之各言姓名帝
驚曰吾求公避逃我何自從吾兒遊乎四人言其故
帝曰煩公幸卒調護太子竟不易太子者四人之力
也

漢濱老父

桓帝幸竟陵過雲夢百姓聚觀老父獨耕不輟尚書
郎張溫異之使問焉笑而不答溫自下道與言老父
曰請問天下亂而立天子耶理而立天子耶昔聖王
宰世茅茨不剪而萬人以寧今子之君勞人自縱何
忍觀乎溫大慙問其姓名不告而去

漢陰叟

楚人居漢水之陰子貢遊見丈人爲圃鑿池抱甕出
灌園用力多子貢教之鑿木爲桔槔丈人曰吾嘗聞

有機事者必有機心也

楚狂

接輿楚人孔子在陳蔡之間楚昭王使人聘孔子將以書社地七百里封孔子楚令尹子西以爲用孔子非楚之福昭王乃止王尋卒接輿狎狂歌而過孔子曰鳳兮鳳兮何德之衰往者不可諫來者猶可追已而已而今之從政者殆而孔子下欲與之言趨而避之不得與之言

祝雞翁

洛陽人居尸鄉北山下養雞百餘年雞皆有名字千餘羣暮棲樹上晝放散之翁行呼名卽種別而至賣雞及子得千萬錢輒置錢去之吳作養魚池後昇吳山白鶴孔雀嘗止其傍

楚江漁者

江陵人以漁爲業得魚則換酒飲輒自歌舞不言姓氏江陵守崔玄見而問之曰君之漁隱者之漁邪漁者之漁邪漁者曰昔姜子牙嚴子陵皆以爲隱者之漁也殊不知非釣其魚釣其名耳

松江漁翁

不知其姓名每棹小舟遊長橋往來波上扣舷飲酒
酣歌自得紹聖中閩人潘裕自京師調官回吳江遇
而異焉過與語翁曰吾厭喧煩處閒曠迹於此三
十年矣幼喜誦經史百家言後觀釋氏書今皆弃去
唯食以嬉且養志者忘形養形者忘利致道者忘心
心形俱忘視軒冕如糞土耳與子出處異趣子勉之
裕曰幸聞先生之高義敢問舍所在曰吾姓名不欲
人知況居室耶飲畢長揖使裕反其所鼓枻而去

順昌山人

靖康末有避亂于順昌山中者深入得茅舍主人風
裁甚整卽之語士君子也怪而問曰諸君何事挈妻
孥至是耶因語之故主人曰亂何自而起衆爭爲言
主人嗟惻久之曰我父爲仁宗朝人也自嘉祐末卜
居于此但知有熙寧紀年亦不知于今幾何年矣

南安翁

漳州陳元忠嘗赴省試過南安會日暮投宿茅茨數
椽竹樹茂密可愛主翁麻衣草履舉止談對宛若士

人几案間文集散亂陳叩之曰翁訓子讀書乎曰種園爲生耳入城市乎曰不出十五年矣問藏書何用曰偶有之耳因襍以他語少焉風雨暴作其二子歸捨鉏揖客不類農家子翁進豆羹享客不復共談遲明別去陳以事留城中翌日見翁倉惶行陳追詰何爲到此曰大兒鬻果失稅爲關吏所拘陳爲謁監征至則已捕送郡翁與小兒偕詣庭下長子當杖翁懇白郡守曰若渠不勝杖則翌日乏食矣願以身代小兒曰大人豈可受杖某願代大兒又以罪在已甘心

焉三人爭不決小兒來父耳旁語若將有所請翁叱之兒必欲前郡守疑之呼問所以對曰大人元係帶職正郎宣和間累典州郡翁急拽其衣使退曰兒狂妄言守詢誥敕在否兒曰見作一束置甕中埋山下守立遣吏隨兒發取果得之卽延翁上坐謝而釋其子次日訪之室已虛矣

漁父

漁父者不知姓名亦不知何許人也太康孫緬爲尋陽太守落日逍遙渚際見一輕舟凌波隱顯俄而漁

父至神韻蕭灑垂綸長嘯緬甚異之乃問有魚賣乎
漁父笑而答曰其釣非釣寧賣魚者耶緬益隆焉遂
褰裳涉水謂曰竊觀先生有道者也終朝鼓柁良亦
勞止吾聞黃金白璧重利也駟馬高蓋榮勢也今方
王道文明守在海外隱鱗之士靡然向風子何不贊
緝熙之美何用晦其若是也漁父曰僕山海狂人不
達世務不辨賤貧無論榮賤乃歌曰竹竿籊籊河水
悠悠相忘爲樂貪餌吞鈎非夷非惠聊以忘憂於是
悠然鼓楫而去

變姓名第四

改名作相

范睢事魏中大夫須賈須賈爲魏昭王使於齊齊襄
王聞睢辯口乃使人賜睢金十觔及牛酒睢辭謝不
受須賈知之大怒以爲睢持魏國陰事告齊故得此
饋旣歸以告魏相魏齊齊大怒使舍人笞擊睢折脅
摺齒睢佯死卽卷以箒置廁中賓客飲者醉更溺睢
及得出伏匿更名姓曰張祿范睢旣相秦號曰張祿
而魏不知以爲范睢已死久矣魏聞秦且東伐韓魏

魏使須賈於秦范雎聞之爲微行敝衣間步之邸見
須賈須賈見之而驚曰范叔固無恙乎曰臣爲人傭
賃須賈哀之留與坐飲食乃取其一綈袍賜之因問
曰秦相張君公知之乎范雎曰主人翁習知之唯雎
亦得謁願爲君借大車駟馬於主人翁范雎歸取大
車駟馬爲須賈御之人秦相府須賈待門下良久問
門下曰范叔不出何也門下曰乃吾相張君也須賈
大驚自知見賣乃肉袒膝行謝罪雎曰汝罪有三所
以得無死者以綈袍戀戀有故人之意故釋公盡請
持魏齊頭來不然者我且屠大梁

更名去位

諸侯使與坐堂上飲食盛設而坐須賈於堂下置莖
豆其側令兩黥徒夾而馬食之數曰爲我告魏王急
持魏齊頭來不然者我且屠大梁

范蠡事越王竟滅吳雪會稽之耻稱大將軍以爲大
名之下難居乃裝其輕寶與其私徒屬浮海出齊變
姓名自謂鴟夷子皮耕于海畔居無幾致產數千萬
齊人聞其賢以爲相蠡喟然曰居家則致千金居官
則致卿相此布衣之極也久受尊名不祥乃歸相印

盡散其財以與知友懷其重寶間行以去止于陶以
爲天下之中善爲生自號陶朱公

載鹽

第五倫官未達客河東變姓名稱王伯齊載鹽往來
太原當所過蝥除

李密

李密去之淮陽變姓名爲劉智遠教授諸生自給

伯顏子中

故元吏部侍郎伯顏子中西域人祖父仕江西因家

焉通春秋五領鄉薦授東湖書院山長陞建昌路儒
學教授尋爲江西行省都事陳友諒兵陷贛州子中
招募壯士欲復城不克間道入福建行省子中出奇
計收復建昌遂浮海獻捷元都授福建行省郎中累
遷至吏部侍郎出使廣東比至未幾而廣已歸附子
中墜馬求死不得折其一足於是子中變姓名浪跡
於江湖間往來居進賢之北山先是其妻子已爲江
西叅政楊憲送京師朋友有弔之者子中答曰吾身
且不有奚暇顧妻子哉於是周游天下誓不復仕悲

歌慷慨未嘗一日忘于元也嘗懷鳩自隨曰如有強我者便當以死答之郡縣聞而義之不之強至是程立本專使招之子中見使者慨然曰吾今死亦晚矣乃具牲酒祭其祖父師友作歌七章飲鳩而死

梁良玉

中書舍人梁良玉郎中族也靖難後易姓名至海南寓市肆粥書爲業中書舍人何申建文末奉使四川金川門不守發憤慟哭吐血不數日死宋和郭節亦中書也變姓名挾卜筮書走異域客死梁良用梁中

節亦定海人任中書父子兄弟八人同仕於朝相率變姓名避去良用去爲舟師中節與郭良同爲道士何洲海州人與宋和等友善相約弃官爲筮人客死異域

雪庵和尚

雪庵和尚名暨不知其姓靖難初方黃之獄殺幾萬人卽不殺謫戍窮邊不死於道死於邊者又幾萬人當是時和尚壯年始慟哭落髮爲僧西南走重慶重慶大竹善慶里山水奇絕可廬和尚又走善慶里里

墟中有隱士杜景賢知和尚非常人與之遊往來白
龍諸山山旁有松栢灘灘水清駛蘿篁森蔚和尚欲
寺焉景賢有力亟爲之寺寺成和尚率其徒數人入
居之昕夕誦經山中人不知書謂其誦佛經乃不知
其誦易乾卦也景賢曰和尚相釋而誦儒不可請誦
佛經景賢意和尚不宜誦儒書恐有蹤跡然又不肯
顯言言則恐和尚走去以故婉解之乃和尚亦知景
賢意遂棄儒經乃誦觀音經寺因名觀音云和尚好
觀楚詞時時以楚詞袖之登小舟急棹灘中流朗讀

一葉輒投一葉於水投已輒哭哭已又讀讀終卷乃
已衆莫測其云何景賢固知之然亦不問和尚和尚
好酒不戒酒日注酒一壺俟客客至輒飲客不至卽
拉樵牧豎入飲飲半酡呼兒童歌曰我歌爾和歌竟
瞑焉而寐和尚頎形秀爽指柔白剪剪落筆成章詞
不甚工密然意氣渙發又能感愴人或曰和尚當建
文壬午爲御史不數月帝遜位和尚固秘跡以歿歿
之日其徒問曰師卽歿宜銘何許人和尚張目曰松
楊問其姓名不答和尚有若干篇今且百四十餘年

民放博玩 卷四 三十一
尚未敢顯行于世或曰此松楊葉希賢也以賢良方正舉爲監察御史

河西傭

河西傭不知何許人建文四年夏六月成祖入金陵卽帝位傭被葛衣走是冬至金城行乞邊地極寒傭常衣葛衣明年過河西依莊浪豪魯家爲傭傭亦取直稍稍積買羊裘披之雖寒必覆之故葛衣葛益破縷縷竟不肯脫故葛衣夏或衣暑布布卽新故葛衣輒覆其上人勸之弃故葛衣不肯弃直悶悶不答

傭錢有餘走市中買牛肉酒與諸乞兒食飲傭力作倦時自吟哦或夜聞其哭泣聲永樂中有留都官從宋總兵至莊浪者欲與言傭走南山中避旬月留都官去乃還有問留都官傭何人者留都官亦不答在莊浪數年病且歿呼主人謝囑曰我歿無殮我棺幸西北風大起火我無埋我骨魯家從其言

川中補鍋匠

川中補鍋匠亦不知何許人往來夔慶間爲人補鍋至州邑不過三日卽去去或復來夔慶有欲學補者

卽教之補鍋不索謝錢直令負擔從有後來學者至卽遣先學者去如是數年夔慶間人識之皆呼爲老鍋匠補鍋或與錢布米不擇當食時與之食卽不復索錢錢稍稍積囊中遇風雨寒暑不出補鍋卽出錢買酒飯自飲食嘗寄宿蕭寺中忽夔州市中逢馮翁者二人相顧愕然已而相持哭哭已相牽入山巖中坐語竟日學補鍋者屏不得聞二人語語已又相持哭且別去言今永訣不可復相見已竟莫知其所終

馮翁

馮翁亦不知何許人在夔州以章句教童子給衣食能爲對句及古詩詩輒自題馬二子或馬公或塞馬先生嘗作詩大書壁間比見補鍋匠歸卽剗去詩曰夜夢何奇特龍飛天漢津朝橫滄海曲夕過滇池濱光霰皆五色蜿蜒無損鱗淵田變化間張主藉高旻時蓋永樂甲申乙酉間未幾辭主人莫知所終

東湖樵夫

東湖樵夫浙東臨海東湖上日負柴入市口不二價建文壬午秋 詔至臨海湖上人相率走縣庭聽

詔或歸語樵夫曰新 皇帝登極樵夫愕然曰
皇帝安在或曰燒宮自焚矣樵夫慟哭遂投湖水中
死竟不知何許人

冒姓名第五

衛青父鄭季給事陽信公主家奴與衛媪通生青故
冒姓衛氏

漢張孟為灌則舍人得幸進之二千石蒙生灌氏

曹操奄宦曹騰養子夏侯嵩之子冒姓曹氏

李元亮本姓安氏少為駱奉先養息冒姓為駱氏

牛千其先本彭城劉氏十世祖凝之事宋及齊受

禪奔元魏自比伍負因姓員

鄭注本姓魚冒為鄭故當時號魚鄭及用事人號為
水族

今狐相綯以姓氏少族人投者不吝其族由是遠
近趨之至有姓胡冒氏者温庭筠戲為詞曰自從元
老登庸後天下諸胡悉帶名

金陵李氏始以唐號國錢文穆王問之曰金陵李氏
冒於巨唐不亦駭人乎沈韜文曰此可取譬也且如

鄉校間有姓孔氏者人則謂之孔夫子復何恠哉王
大笑

五代劉知遠其先沙陀郡人冒姓劉

石敬瑭其父臬揆鶻本出於西夷冒姓名

楊復恭

楊復恭常肩輿抵太極殿宰相對延英論叛臣事孔
緯曰陛下左右有將反者帝矍然緯指復恭復恭曰
臣豈負陛下者緯曰復恭陛下家奴而肩輿至前殿
廣樹不逞皆姓楊非反邪復恭曰欲收士心輔天子

帝曰誠欲收士心胡不假李姓乎復恭無以對

冒名為商

冒名為商建康城南曾公大為人持重居官清廉登
第之後七年六考赴班授建昌新城縣居家闕期尚
隔兩年一日立於門外忽見一人負名牌而至題曰
新知建昌軍新城縣事曾宣教公大甚駭少間有一
人乘車而至問為何官曰曾知縣也延之上坐問其
諱則曰公大問登第之年又同曾公曰姓同名同官
同而年同此其故何也其人起而謝曰某昨於部中

見此姓名注授知其履歷故冒姓名爲商耳不知爲公也今當更之曾公大笑亦不詰問真仁人也

詭姓名第六

權臯事永王舉兵脅士大夫臯詭姓名以免

李知遠選人于姓僞詭爲丁

耻姓名第七

李抱玉上言世占涼州耻與逆臣共宗有詔賜之姓因徙籍京兆舉族以李爲氏

桑維翰舉進士主司惡其姓桑喪同音人勸勿舉進

士維翰著日出扶桑賦以見志又鑄鐵硯曰硯弊則改而他仕卒及第

慕姓名第八

慕古賢名梁世有庾晏嬰祖孫登連古人姓名字亦鄙才也

東丹國長子突欲奔唐賜姓李名贊華工畫本國人物鞍馬習舉子能爲詩慕白樂天每通名刺云鄉貢進士黃居難字樂地欲比白樂天也

戲姓名第九

晉王道與諸葛恢戲爭族氏王曰人言王葛不言葛
王何也恢曰譬如驢馬驢能勝馬乎

宋殷淳字子孚與何勗共食孚羹盡勗曰益殷羹羹
勗司空無忌子也孚徐輟筯曰何無忌憚

林蘊辯給嘗有姓崔者矜氏族蘊折之曰崔杼弑其
君林放問禮之本優劣如何其人俯首不能對

梁時朝士有姓吉者謁尚書令何敬容卒問曰君於
丙吉幾世矣答曰如明公之於蕭何一時傳以爲笑
隋何妥八歲顧良戲曰汝姓是荷葉之荷爲河水之

河妥曰先生姓顧是眷顧之顧爲新故之故衆異之

不稱姓名第十

張說開元後宰相不以姓著曰燕公

本朝洪武三年議賞將士 詔稱大將軍等運謀竭

忠六師用命遂致強殞弱伏疆宇奠安諸番入貢華

夷一統四年命左右相 詔稱大將軍收戈解甲於

武備之庫息馬家庭從善樂游功名兩全古何過哉

皆謂中山王也十九年優恤高年 詔稱朕命前征

虜大將軍中山武寧王開平忠武王等發兵諸道所

向兵偃民得粗安

著姓名第十一

後漢韓康伯字伯休賣藥長安市時有女子從康買藥康守價不移女子怒曰公是韓伯休耶乃不二價乎康歎曰我本欲避名今小女子皆知我何用藥爲李白失意遊華山縣宰方開門決事白乘醉跨驢過門宰怒不知太白也引至庭下曰汝何人輒敢無禮白乞供狀無姓名曰曾用龍巾拭吐御手調羹力士脫靴貴妃捧硯天子殿前尚容我騎馬華陽縣裏不

得我騎驢

裴度討吳元濟平淮西以功封晉國公名震四夷使外國者其君長必問度年幾狀貌孰似

元宗嘗欲用張嘉貞而忘其名夜詔中書侍郎韋抗曰朕嘗記其風操而今爲北方大將張姓而復名卿爲我思之抗曰非張齊丘乎今爲朔方節度使帝卽使作詔爲相夜且半因閱大臣表疏舉一則嘉貞所獻遂得其名卽以爲中書侍郎同中書門下平章事宣宗命相必探中外有人望者三兩人姓名撚之致

香案上以物覆之焚香探丸以命草麻

韓愈論宮市貶陽山今有愛在民民生子多以其姓
字之

五代盧文紀形貌魁偉廢帝奇之及帝立欲擇相悉
書清望官姓名內琉璃瓶中夜焚香祝天以筮探之
首得文紀欣然相之

遼人夏人遣使入朝與吾使至虜中者虜必問司馬
公起居及爲相遼人敕其邊吏曰中國相司馬矣謹
毋生事開邊隙司馬公上疏論新法利害曰後當如

是行之十餘年無一不知公言者天下傳誦以公爲
真宰相雖田父野老皆號司馬公而婦人孺子知其
爲君實也

王樞密疇之夫人梅鼎臣之女也景德初樞密副使
梅夫人入謝慈壽宮太后問夫人誰家子對曰梅鼎
臣女

呂某公歸老于洛嘗遊龍門還閣者執筆曆請官稱
公題以詩云思山乘輿看山回烏帽綸巾入帝臺閣
吏不須詢姓字也曾三到鳳池來

氏族博攷卷之五

吳興 凌廸知雅哲 纂

同郡 吳 京朝卿 校

氏源

得姓受氏三十二類

一曰以國為氏二曰以邑為氏天子諸侯建國故以國為氏虞夏商周魯衛齊宋之類是也卿大夫立邑故以邑為氏崔盧鮑晏臧費柳楊之類是也

三曰以鄉為氏四曰以亭為氏封建有五等之爵降

公而爲侯降侯而爲伯降伯而爲子降子而爲男亦有五等之封降國侯而爲邑侯降邑侯而爲關內侯降關內侯而爲鄉侯降鄉侯而爲亭侯學者但知五等之爵而不究五等之封關內邑者溫原蘇毛甘樊祭尹之類是也但附邑類更不別著裴陸龐閻之類封於鄉者故以鄉氏糜采歐陽之類封於亭者故以亭氏

五曰以地爲氏有封土者以封土命氏無封土者以地居命氏蓋不得受氏之人或有善惡顯著族類繁盛故因其所居之所而呼之則爲命氏焉居傅巖者爲傅氏徙稽山者爲稽氏主東蒙之祀則爲蒙氏守橋山冢則爲喬氏彤氏因彤班食於彤門潁氏因考叔封於潁谷封人東門襄仲爲東門氏桐門右師爲桐門氏皆此道也隱逸之人高傲林藪居於祿里者呼之爲祿里氏居於綺里者呼之爲綺里氏所以爲美也優倡之人取媚酒食居於社南者呼之爲社南氏居於社北者呼之爲社北氏所以爲賤也又如介之推燭之武未必亡氏由國人所取信也故特標其

地以異於衆凡以地命氏者不一而足

六曰以姓爲氏姓之爲氏與地之爲氏其初一也皆因所居而命得賜者爲姓不得賜者爲地居於姚墟者賜以姚居於瀛濱者賜以瀛姬之得賜居於姬水故也姜之得賜居於姜水故也故曰因生以賜姓七曰以字爲氏八曰以名爲氏九曰以次爲氏凡諸侯之子稱公子公子之子稱公孫公孫之子不可復言公孫則以王父字爲氏鄭穆公之子曰公子駢字子駟其子曰公孫夏其孫則曰駟帶駟乞宋桓公之子曰公子目夷字子魚其子曰公孫友其孫則曰魚莒魚石此之謂以王父字爲氏無字者則以名魯孝公之子曰公子展其子曰公孫夷伯其孫則曰展無駭展禽鄭穆公之子曰公子豐其子曰公孫段其孫則曰豐卷豐施此諸侯之子也天子之子亦然王子狐之後爲狐氏王子朝之後爲朝氏是也無字者以名然亦有不以字而以名者樊皮字仲文其後以皮爲氏伍貞字子胥其後以貞爲氏皆由以名行故也亦有不以王父字爲氏者如公子遂之子曰公孫歸

氏族傳文

父字子家其後爲子家氏是也又如公孫枝字子桑其後爲子桑氏者亦是也亦有不以王父名爲氏而以父名爲氏者如公子牙之子曰公孫茲字戴伯其後爲茲氏是也又如季公鉏字子彌其後爲公鉏氏者亦是也以名字爲氏者不一而足左氏但記王父字而已以次爲氏者長幼之次也伯仲季叔之類是也次亦爲字人生其始也皆以長幼呼及乎往來旣多交親稍衆則長幼有不勝呼然後命字焉長幼之次可行於家里而已此次與字之別也所以魯國三

家皆以次命氏而亦謂之字焉良由三家同出其始也一家之人焉故以長幼稱

十曰以族爲氏按左傳云爲諡因以爲族又按楚辭云昭屈景楚之三族也昭氏景氏則以諡爲族者也屈氏者因王子瑕食邑于屈初不因諡則知爲族之道多矣不可專言諡也族近於次族者氏之別也以親別疎以小別大以異別同以此別彼孟氏仲氏以兄弟別也伯氏叔氏以長少別也丁氏癸氏以先後別也祖氏禰氏以上下別也第五氏第八氏同居之

別也南公氏南伯氏同稱之別也孔氏子孔氏旗氏
子旗氏字之別也軒氏軒轅氏熊氏熊相氏名之別
也季氏之有季孫氏仲氏之有仲孫氏叔氏之有叔
孫氏適庶之別也韓氏之有韓餘氏傅氏之有傅餘
氏梁氏之有梁餘氏餘子之別也遂人之族分而為
四商人之族分而為七此枝分之別也齊有五王合
而為一謂之五王氏楚有列宗合而為一謂之列宗
氏此同條之別也公孫歸父字子家襄仲之子也歸
父有二子一以王父字襄仲為仲氏一以父字子家

為子家氏公子郢字子南其後為子南氏而復有子
郢氏伏羲之後有伏處二氏同音異文共叔段之後
有共氏又有叔氏又有段氏凡此類無非別族

十一曰以官為氏十二曰以爵為氏有官者以官無
官者以爵如周公之兄弟也周公為太宰康叔為司
寇聃季為司空是皆有才能可任以官者也五叔無
官是皆無才能不可任以官者也然文王之子武王
周公之兄弟雖曰無官而未嘗無爵士如此之類乃
氏以爵焉以官為氏者太史太師司馬司空之類是

也雲氏庾氏籍氏錢氏之類亦是也以爵爲氏者皇
王公侯是也公乘公士不更庶長亦是也

十三日以凶德爲氏十四日以吉德爲氏此不論官
爵惟善惡顯著者爲之以吉德爲氏者如趙衰人愛
之如冬日其後爲冬日氏古有賢人爲人所尊尚號
爲老成子其後爲老成氏以凶德爲氏者如英布被
黥爲黥氏楊玄感梟首爲梟氏齊武惡巴東王蕭子
響爲同姓故改蕭爲峭後魏惡安樂王元鑿爲同姓
故改元爲元

十五日以技爲氏此不論行而論能巫者之後爲巫
氏屠者之後爲屠氏卜人之後爲卜氏匠人之後爲
匠氏以至豢龍爲氏御龍爲氏干將爲氏烏浴爲氏
者亦莫不然

十六日以事爲氏此又不論行能但因其事而命之
耳夏后氏遭有窮之難后緡方娠逃出自竇而生少
康支孫以竇爲氏漢武帝時田千秋爲丞相以年老
詔乘小車出入省中時號車丞相其後因以爲車氏
微子乘白馬朝周茲白馬氏之所始也魏初平中有

隱者常乘青牛號青牛先生茲青牛氏之所始也
十七曰以諡爲氏周人以諱事神諡法所由立生有
爵死有諡貴者之事也諡乃貴稱故亦可以爲氏莊
氏出於楚莊王僖氏出於魯僖公康氏者衛康叔之
後也宣氏者魯宣伯之後也文氏武氏哀氏繆氏之
類皆氏於諡者也凡復姓者所以明族也一字足以
明此不足以明彼故益一字然後見分族之義言王
氏則濫矣本其所系而言則有王叔氏王孫氏言公
氏則濫矣本其所系而言則有公子氏公孫氏故十

八曰以爵系爲氏唐氏雖出於堯而唐孫氏又爲堯
之別族滕氏雖出於叔繡而滕叔氏又爲叔繡之別
族故十九曰以國系爲氏季友之後傳家則稱季孫
不傳家則去孫稱季叔牙之後傳家則稱叔孫不傳
家則去孫稱叔故二十曰以族系爲氏士季者字也
有士氏又別出爲士季氏伍參者名也有伍氏又別
出爲伍參氏此以名氏爲氏者也有如韓嬰者本
出韓國加國以名爲韓嬰氏如臧會者本出臧邑加
邑以名爲臧會氏如屠住者本出住鄉加鄉以名爲

屠佳氏故二十一日以名氏為氏而國邑鄉附焉禹
 之後為夏氏杞他奔魯受爵為侯又有夏侯氏出焉
 媯姓之國為息氏公子邊受爵為大夫又有息夫氏
 出焉此以國爵為氏者也白氏舊國也楚人取而邑
 之以其後為白侯氏故二十二曰以國爵為氏而邑
 爵附焉原氏以周邑而得氏申氏以楚邑而得氏及
 乎原加伯為原伯氏以別為原氏申加叔為申叔氏
 以別於申氏是之謂以邑系為氏魯有沂邑因沂大
 夫相魯而以沂相為氏周有甘邑因甘平公為王卿

士而以甘士為氏故二十三曰以邑系為氏而邑官
 附焉師氏者太師氏也史氏者太史氏也師延之後
 為師延氏史晁之後為史晁氏此以名隸官是之謂
 以官名為氏呂不韋為秦相子孫為呂相氏酈食其
 之後為食其氏曾孫武為侍中改為侍其氏此以官
 氏為氏者也故二十四曰以官名為氏而官氏附焉
 以諡為氏所以別族也邑而加諡如苦成子之後為
 苦成氏臧文仲之後為臧文氏氏而加諡者如楚釐
 子之後為釐子氏鄭共叔之後為共叔氏爵而加諡

者如衛成公之後爲成公氏楚成王之後爲成王氏
故二十五曰以邑諡爲氏二十六曰以諡氏爲氏二
十七曰以爵諡爲氏也按古人著複姓之書多矣未
有能明其義者也有中國之複姓有夷狄之複姓中
國之複姓所以明族有重複之義二字具二義也以
中國無衍語一言見一義夷狄多侈辭數言見一義
夷狄有複姓者侈辭也一言不能具一義必假數言
而後一義具焉其於氏也則有二字氏有三字氏有
四字氏其於音也則有二合音有三合音有四合音

觀譯經潤文之義則知侈辭之道焉論中國亦有二
之音如者焉二合爲旃者與之與二合爲諸之類是
也惟無三合四合之音今論中國亦有二字之氏惟
無三字四字之氏此亦形聲之道自然相應者也二
十八曰代北複姓二十九曰關西複姓三十曰諸方
複姓此皆夷狄二字姓也三十一曰代北三字姓侯
莫陳之類是也三十二曰代北四字姓自歿獨膊之
類是也

通志書氏
族序畧

氏族博攷卷之六
九

氏族博攷卷之六

吳興 凌迪知雅哲 纂
同郡 吳 京朝卿 校

氏按

唐氏

按釋例唐姬姓又公子譜一曰成王封叔虞於唐號曰唐叔侯其子燮父之後春秋時國小微弱遂屬為楚邑據此當云其子燮父之後別封于唐近於楚微弱遂為楚屬邑又按堯之後分為六唐氏杜氏范氏

氏族博攷 卷之六

氏方世
卷一
劉氏韋氏祁氏皆爲著姓豈堯澤之不泯歟

秦氏

太史公曰秦之先爲嬴姓其後封分以國爲姓有徐氏邾氏莒氏鍾離氏運奄氏莧裘氏將梁氏黃氏江氏脩魚氏白冥氏蜚廉氏秦氏然秦以其先造父封趙城爲趙氏按嬴姓也秦氏也何以謂國爲姓乎徐邾莒黃江國也以國爲氏者鍾離楚邑莧裘魯邑也以邑爲氏者蜚廉人名也以名爲氏者何謂以國爲姓乎凡此十三氏并趙爲十四氏其爲氏不同而姓

則同嬴也由司馬氏作紀世家爲譜系之始而昧於此義致後世之言姓氏者無別焉言秦者又有三秦國之後以國爲氏其有出於魯者以邑爲氏蓋魯有秦邑故也出於楚者未知以邑以字與然此三秦者所出旣殊皆非同姓彼十四氏雖不同秦而同嬴是爲同姓此三秦者雖同秦而不同嬴是不爲同姓古者婚姻之制別姓不別氏三秦可以通婚姻十四氏不可以通婚姻此道湮蕪已久譜牒之家初無識別

漢氏

按三代之時天子諸侯傳國支庶傳氏其傳國者國
亡則以國爲氏三代之後雖有國號無問適庶皆以
氏傳而謂之姓如漢家雖亡亦稱劉氏或有稱漢者
雖存古道而存爲希姓

魯氏

按魯自莊公之時齊桓公始伯爾後齊爲盟主魯共
命之不暇則報政之言周公不虛也况魯自襄仲殺
適立庶宣公之後公室微弱政在三家昭公不反國
哀公卒于有山氏可哀也哉魯起周公至頃公三十

四世豈周公之澤流芳浸遠而微弱之漸亦由伯禽
立政之所始也

吳氏

按太伯號句吾舊曰句吳地名然吳曰句吳越亦曰
句踐皆是名號非謂地名句者吳越之語辨也

晉氏

按晉魯大國而其子孫希少者皆由疆臣剝喪公室
枝葉凋落其來已久及夫亡國之日公族無幾矣齊
亦如是

郇氏

按文王第十七子封郇國郇音荀一音環今有環音之氏而未間荀者

按譜文王十七子然原郇二侯不在其列此譜系之家失於紀載原郇為文王之昭左氏見之甚明

凡氏

按凡者周公之後為凡國汎者周大夫采邑也自是兩家因知姓氏家有避地改姓之言多無足取

邠氏

按大王去邠去岐其屬族留于邠者為邠氏

楚氏

按陸終氏娶鬼方之女孕而不育十一年開其左脇而出三人焉又開其右脇而出三人焉長曰昆吾名樊為已姓封於衛墟次曰參胡董姓封於韓墟周時為胡國楚滅之三曰彭祖名翦彭姓封於韓大彭之墟即彭城也四曰會人妘姓封於鄭墟五曰安曹姓封於邾之墟六曰季連芊姓其後為楚昆吾氏為夏伯湯伐桀滅之彭祖氏為商伯商之末世始亡

按千寶之論曰先儒多疑此事譙周作古史考以爲
妄記廢而不論然六子之世子孫有國數千年間迭
爲伯王天將興之必有尤物若夫前志所傳修己皆
坼而生禹簡狄坼而生契歷代久遠莫足相證近
魏黃初五年汝南屈雍妻王氏生男從右脇下水腹
上出而平和自若數月創合母子無恙

按浮屠氏稱釋迦生於摩邪夫人之右脇亦此理也
其徒信之而不疑何學者之疑陸終氏之事宋甫用
尉舍之左有市人之妻生男從股髀間出亦能創合

母子無他恙此又足以明屈雍之事不誣

又按以王父字爲氏者古之道也然亦有以名爲氏
者楚以鬻熊之故世稱熊氏女子則稱芊焉楚國亡
於秦漢之世是時姓氏之道泯矣故楚以熊著而楚
族無聞

陳氏

按陳媯姓也然伍員曰夏少康爲有仍牧正逃奔有
虞虞思妻之以二姚是則又爲姚姓也蓋媯姓始於
周姚姓自夏有之然則堯妻舜以二女而賜之姓者

賜以姚也謂為媯誤矣自是之前為虞國至商為遂國未知虞之存於商否然至周則遂虞皆為姬姓國矣而封胡公於陳自是陳稱媯不復言姚矣

薛氏

按薛氏血脈譜文王曹夫人姜氏見赤龍交而孕十二月生子手把薛字因氏為薛乃知譜牒家言多無足取者

沈氏

按唐表云沈氏出自姬姓周文王第十子聃叔季字

子揖食采於沈成八年為晉所滅沈子生逞字循之奔楚遂為沈氏生嘉字惟良二子尹丙尹戊尹戊字仲違奔楚隱於零山為楚左司馬生諸梁據春秋釋例沈國今言食采則邑耳又釋例所記沈子揖沈子嘉沈子逞皆本春秋今唐表言聃季字子揖何所本也逞字循之嘉字惟良此皆野書之言無足取也

夔氏

按傳言夔之先楚鬻熊之嫡嗣有疾不得代而別封於夔為楚附庸其後為夔子然據夔氏譜則鬻熊十

世而後有夔子未知孰是

向氏

按公子盼字向父其義音響與晉叔向名字同音今以為氏而音餉疑古人讀盼向之向有響餉二音也

龔氏

按項羽傳義帝柱國共敖顏師古云共讀曰龔龔即共也籀文從龍又按後漢巴郡蠻酋羅朴督鄂度夕龔凡七姓是巴蠻亦有龔氏

蒙氏

按蒙山在沂州費縣西北八十里又有東蒙在費西北七十五里在蒙山之東主其山之祀者子孫因山為氏

綺氏

按四皓非顯達之人其初不得受氏之祖故以所居為氏此三代之事也如介之推燭之武冀芮穎考叔之類是矣

姚氏

按虞有二姓曰媯因姚墟之生而姓姚因媯水之居

而姓媯故姚悛改姓爲媯而媯皓又改姓爲姚知姚與媯二姓可通

羸氏

按羸地名也杜預云泰山羸縣唐并入兗州博城博城今爲奉符以所居於羸故因生以姓或言河間有羸水故爲羸州卽羸姓所居之地

芊氏

按三代之時男子未嘗稱姓支庶未嘗稱國秦滅六國諸侯子孫皆爲民庶故或以國以姓爲氏所以楚之子孫可稱楚亦可稱芊

林氏

按林氏周平王庶子林開之後開生林英英生林茂林慶世系甚明而譜家謂王子比干爲紂所戮其子堅逃長林之山遂爲氏按古人受氏之義無此義也魯有林放子孫世仕季氏故曰林氏之先皆季氏之良也然桓王之孫又有林英林茂者王子克之子也按林氏在唐末爲昌宗而特詳著豈林寶作元和姓纂故爾然林氏出比干之子堅之說由寶傳之也著

書之家不得有偏徇而私生好惡所當平心直道於我何厚於人何薄哉

丕氏

按丕鄭亦曰丕鄭父名字通稱也父者男子之美稱則知自稱為丕鄭人稱之曰丕鄭父

彌氏

按王父字為氏者皆公子也諸侯支庶之子為所始之宗故以其字為氏今彌牟者公子郢之子靈公之孫也以此則知亦有以公孫之字為氏者

析氏

按鄭公孫黑字子皙楚公子黑肱亦字子皙今析朱鉏乃公子黑之子疑析即黑之字耳皙亦作析

石氏

按晉楊食我字伯石鄭公孫段字子石則知此之為石者必其字也

慶氏

按諸侯之子稱公子公子之子稱公孫公孫之子以王父字為氏今無虧之子慶父其後為慶氏此又以

父字為氏而不以王父字為氏也不可一槩言

若敖氏

按若敖者楚君熊義字也或言楚國尊者稱敖如霄敖邾敖之類是也

桑氏

按以王父字為氏者公子之為王父者也今公孫枝之後亦用公孫字為氏

以名為氏

按諡法起於周自堯舜禹湯之前雖天子亦以名呼

故其後之人亦以名氏焉

宓氏

按伏宓同出伏羲氏異文者其後之人以別族也

帝王名

按中古之前一代質於一代中古之後一代文於一代觀堯舜禹湯猶且名焉則二帝之前良可知伏羲又曰太昊帝嚳又曰高辛皆二命也堯曰放勳舜曰重華禹曰文命湯曰天乙從可知也

召氏

按召咸作邵呂公之後春秋召與邵一氏而後世分
爲二齊有召漢功臣有召歐又汝南安陽之族皆從
邑

堯氏

按諡義起於周後人不知而作諡法以堯舜禹湯爲
諡誤矣此皆名也

甲氏

按商人之道以實不以文故命名無義歿亦無諡自
太甲至帝乙紂辛幾四十世惟以十日命生之與歿

皆以是已之所稱人之所呼亦以是逮周生有名歿
有諡生以義名歿以義諡生曰昌曰發歿曰文曰武
微子啓微仲衍箕子比干皆周人也故去其甲乙丙
丁之類始尚文焉

廉氏

按古者帝王猶以名行况臣下乎此以名爲氏然以
名字爲氏者起於商周之世今此廉氏未有所徵且
從大廉之號焉

和氏

按堯舜二典所命之官如臯夔益稷之類皆以名稱和以名爲氏仲叔又其長幼之稱也

皮氏

按世譜樊皮字仲文此則以名爲氏不以字爲氏也

輿氏

按伯輿名也

狐氏

按左傳大戎狐姬生公子重耳小戎子生夷吾姬姓也狐氏也戎國也言戎國狐氏姬姓之女凡姓別婚

姻氏別貴賤此言狐姬者明此姬出於王子狐之後貴族之女故兼氏言之蓋戎國不足貴矣所貴者狐氏則知王子狐之後有居於戎者也

牙氏

按穆王所以命君牙無因不以名命也

展氏

按隱八年無駭卒駭者展之孫也傳言羽父請氏公命以字爲展氏然孝公之子四人惠公公子益師字衆父其後爲衆氏公子彊食臧邑其後爲臧氏公子

展名也古人尚質有名無字者多矣益師有字則以字氏彊有邑則以邑氏展無字邑則以名為氏何必專守王父字之說乎

兹氏

按公孫兹曰戴伯戴諡也伯長也皆不以為氏而以名為氏則知古人以名行者初不以為惡也以此亦知不以公子字而以公孫名者亦可為氏也

居氏

按先且居字霍伯此以名為氏者

段氏

按共叔段者共諡叔字段名也此以名為氏者春秋鄭伯克段于鄆段名也封於京故謂京城大叔亦謂之太叔氏

豐氏

按穆公之子皆以王父字為氏公子去疾字子良其後為良氏良止是也公子喜字子罕其後為罕氏罕虎罕魍是也公子驍字子駟其後為駟氏駟帶駟乞是也公子偃字子游其後為游氏游吉游販是也以

至子孔子國子印子然皆然惟公子豐無字其後爲
豐施豐卷並以名爲氏

子郢氏

按公子郢字子南已有子南氏復有子郢氏此後之
人所以別族也

熊氏

按古之諸侯傳國者爲諸侯則稱國支庶非諸侯乃
稱氏今楚有國稱王而其君世稱熊氏蠻夷之道也

班氏

按鬪穀於菟爲虎所乳故名穀於菟而字之曰子文
其子曰鬪般與班同音不應父曰班而子亦以般名
者此以名爲氏者

枝氏

按此必晉欒枝或秦大夫公孫枝之後也以名爲氏
者若枝如子躬其後自爲枝如氏矣

奚氏

枝奚仲封於薛薛任姓也

幾氏

按幾氏子姓仲幾字子然此以名爲氏者

余氏

按余氏隗姓國語潞洛泉余滿皆赤翟隗姓

季氏

按世譜云諸侯之子稱公子公子之子稱公孫公孫以王父字爲氏行父是季友之孫故爲季氏又爲季孫氏也然季氏自行父至季孫彊竝稱季孫氏以傳家故也如季公鳥季公亥之類凡支庶竝稱季氏以別

丁氏

按諡法雖始有周周自文王以後世世稱諡是時諸侯猶未能徧及晉魯大國也魯再世伯禽稱魯公晉再世燮父稱晉侯曹蔡皆四世未稱諡齊再世伋稱丁公三世得稱乙公四世慈母稱癸公五世哀公不辰而後稱諡則知所謂丁公者長第之次也

祖氏

按祖者子孫所稱其先也支庶以是爲氏不獨祖乙也祖辛祖丁祖庚祖甲之子孫往往皆稱祖氏

左氏景氏

按所著春秋傳即倚相之後世為楚左史官非左丘明明居左丘為左丘氏非左氏也又按景諡也楚未之聞疑齊景公之後盛繁此為姜姓之族與

傅餘氏

按餘者餘子之族也世本於韓餘已言之矣

褐餘氏

疑褐冠子之後也桓叔之後何以言褐

史氏

按史之為氏者非獨佚也周有史佚史興晉有史蘇史黯史趙史龜史墨楚有史捍史皇衛有史鰭史狗史朝齊有史囂凡此之類並以史為氏而未得世系者又有太史氏內史氏左史氏右史氏皆主於史不容無別

褚氏

按褚氏即褚師氏後世略去師遂為褚氏然衛亦有褚師氏不獨宋也

司馬氏

按晉有司馬鄔司馬彌牟司馬寅齊有司馬竈楚有司馬子魚司馬督宋有司馬彊陳有司馬桓子是皆以司馬為氏不獨程伯休父也

寇氏

按司寇氏或略去司然蘇忿生之後為蘇氏此以司寇氏者未必忿生之裔

宗氏

按宗伯掌禮之官伯夷秩宗其來久矣則宗氏不必因周宗伯而後命氏

廐尹氏

按廐尹即宮廐尹也鬪氏世為之

將軍氏

按世譜子郢者靈公之子未聞有子昭

李氏

按李氏涼武昭王有國二十年高祖有天下三百年支庶既蕃子孫必衆然譜牒之議紛紛不知何始以理官為氏以食木子又為李氏此何理也以官為氏者容有此理以食木子為氏而取理同音者無是理

也今不得其始姑從理說實在官列又按唐家有天下必欲世系詳明然自成紀令之後信以傳信自成紀令之前疑以傳疑蓋譜牒之家信疑相半尚為成紀令因居之其後遂為隴西成紀人故言李者稱隴西又按自明皇以後凡十四代諸王下出閣不分房子孫闕而不見唐之初也自高祖至睿宗子孫皆使之治官臨民然後立功立事故有可著而其後亦盛大且以天族龍種之慧而使之出人間親世事知稼穡之艱難是故功臣文士輩出雖經武后中宗之變

而唐祚不衰自明皇之後皇子皇孫皆因納於富貴嗜欲之間遂令文章事業之姿變為奇技淫巧之行枝葉披離則本根無所庇所以唐室自明皇之後一日不振於一日以此觀之則周家享國長久也宜哉

皇氏

按公衍公為即公子衍公子為去子而言公則公為爵矣昭公失國故其子孫以爵為氏

巫氏

按此以技術傳家因為氏魯有巫尪又有鍼巫氏

晉有巫臯

屠氏

按屠蒯者晉之膳宰也屠氏之職以割牲為事

白馬氏

按周時無白馬氏此當為公孫瓚是也

敬氏

按姓氏之別起於商周如姓苑所引黃帝之事多不經之語又敬氏至宋朝以諱改為文今潞公家是其氏也亦改為恭氏而晉太子申生諡恭君其後以為

氏亦作共漢代郡太守共友

肅氏

按邲武未聞有諡此則周卿士成肅公之後也一云肅慎氏歸中國改為肅氏梁有吳郡太守西豐侯肅

正

複姓

按複姓者為有重複之義兩字俱二義也有王氏而又有叔有子所以別王氏之族有公氏而又有子有孫所以別公氏之義或以爵系別或以國系別或以

氏族博考 卷六
族系別或以名氏別或以邑氏別皆本乎兩字之義所以別族是之謂複也後世虜姓多兩字而無兩字之義名雖同而實異耳

叔孫氏

按叔氏桓公子叔牙之後叔牙飲醕而卒季友爲之立後故以叔爲氏至於得臣則叔牙之孫也故爲叔孫氏

鬪彊氏

按世本世系及名氏多與春秋公子譜不同譜中自

無鬪彊雖有鬪般又鬪穀於克之子若敖之曾孫也

韓嬰氏

按世譜韓宣子玄孫無名嬰者惟韓襄王太子嬰

長孫氏

按北朝之制雖文采不足而古道猶存觀武王得天
下封同姓五十國而兄弟之國十有六今獻帝十姓
而七分兄弟其國豈非成周之道乎元魏之起甚微
其後盛彊奄有中原垂百六十載豈無所自而然北
史長孫嵩傳止言父仁爲南部大人初名沙漠雄號

拔拔氏而不言與魏同族無忌傳亦不載及考唐世系表乃知仁卽鬱律長子什翼犍之兄而珪之伯父也按魏與功臣世世爲婚而嵩及道生爲道武三代功臣之首無通姻皇族者亦可推矣第宗室傳允神元昭穆之後卽陳留衛王其裔皆踈於嵩而嵩獨別賜氏不隸屬籍何耶又考本紀但言什翼犍爲鬱律次子不言沙莫雄而世系所傳必有據今世長孫與元氏婚恐不能免不避宗之譏也宰相系又言道武時以嵩宗室之長故曰長孫氏孝文以獻帝長兄爲

紇骨氏次兄普氏爲周氏又次兄爲達奚氏又次兄伊婁氏改婁氏又次兄爲達奚氏又次兄敦丘氏爲丘氏又次兄侯氏爲万侯氏叔父之後乙旃氏爲叔孫氏疏族車焜氏爲車氏曰十姓不知何緣不稱拓拔氏改丘氏及據孝文改達奚氏爲奚氏不應又有達奚皆不可曉

顏氏

按顏氏曹姓顓帝玄孫陸終第五子曰安安裔孫挾周武王封之於邾爲魯附庸至於夷父字顏公羊謂

之顏公子孫因以為氏據圈稱陳留風俗傳及葛洪
 要士皆如此云但謂顏為武公然郝自顏六世至文
 公遽除始有爵諡武公之號未必然也王儉譜云顏
 氏出自魯侯伯禽支庶食萊顏邑因氏焉真卿尚書
 譜云未知儉何所憑故當依圈葛二家及舊譜為定

干氏

楊萬里談晉于寶一吏取禮部韻書下注晉有于寶
 以進曰乃干寶非于也楊大喜以為一字師然余家
 所藏宋板晉書文選俱作于寶于今升及搜神記周

禮注亦俱作于無有稱干者胡承之以為字畫相沿
 之訛而取于子書為證按春秋有干雙後漢有干吉
 寶豈其後耶然亦自有于定國焉知寶之不為其後
 也陸法言廣韻止引干雙而不及寶何法盛晉書稱
 寶撰晉紀及搜神記而不及干字恐未可據

桂氏

按後漢大守陳球碑陰有城陽炁橫被誅四子一守
 墳姓炁一避難徐州姓胥一居幽州姓桂一居華陽
 姓炁四字竝音桂字各九畫避難也

范氏

按范氏帝堯裔孫劉氏累之後伊祁姓自虞以上為陶唐氏夏為卿龍氏商為豕韋氏周為唐杜氏周衰奔晉為范氏

鬪氏

按鬪氏芋姓若敖之後若敖名熊義其先無字鬪者必邑也其地未詳若敖娶於邲生鬪伯比淫於邲于之女生子文焉弃諸夢澤中虎乳之邲子見而收之楚人謂乳為穀謂虎為於菟故名之曰鬪穀子文楚

之良也世為令尹秉楚政

孔氏

按孔氏子姓出宋閔公之後閔公生弗父何以有宋而授厲公三世生正考父傳所謂三命滋益恭者考父生孔父嘉為大司馬魯隱公三年宋穆公疾召孔父而屬殤公焉桓公三年宋華父督見孔父之妻于路目逆而送之曰美而豔遂殺嘉而取其妻其子奔魯嘉字孔父後世以字為孔氏又為孔父後世以字為孔氏又為孔父氏自孔父六世而生仲尼三歲舉

父十九而娶娶一年而生鯉以哀公十六年四月巳
丑卒年七十二葬魯城北泗上自漢以來孔氏襲奉
百世不絕又衛有孔氏不知所出爲衛世卿魯文公
元年孔達始見傳昭公七年衛襄公夫人無子嬖人
媼始生孟縶孔成子夢康叔謂已立元余使羈之孫
圉與史狗栢之故孔氏之孫世爲衛大夫又鄭有孔
氏穆公蘭之後也穆公之子十三人其二皆爲孔氏
宋子生子曰公子喜字子孔遂爲孔氏圭嬖生子曰
公子志字子孔亦爲孔氏後無聞

王氏

按王氏天子之裔也所出不一有姬姓之王有媯姓
之王有子姓之王有虜姓之王若琅琊太原之王則
曰周靈王太子晉以直諫廢爲庶人其子宗恭爲司
徒時人號曰王家若京兆河間之王則曰周文王第
十五子畢公高之後畢萬封魏後分晉爲諸侯至王
假爲秦所滅子孫分散時人號曰王家或言魏至昭
王彤生無忌封信陵君信陵君生間憂憂生單子秦
滅魏單子逃于秦山漢高帝召爲中涓封榮陵侯時

氏左傳卷六
人以其王族也謂之王家此皆姬姓之王也出於北海陳留者則曰舜之後也其先齊諸田爲秦所滅齊人號爲王家此子姓之王也出於河南者則爲可類氏出於馮翊者則爲鉗耳族出於莒州者本高麗出於安東者本阿布恩此皆虜姓之王也以其所出既多故王氏族最爲蕃盛云

穆氏

按穆或作繆音同或有紕繆之音子姓宋穆公之後其後以諱爲氏

盛氏

按周之同姓國也後爲齊所滅穆天子傳云盛姬之國公羊云成降于齊師成者盛也以諱滅同姓故言成也又有奭氏召公奭之後也蓋以名爲氏後避漢元帝諱故改奭氏爲盛氏焉

張氏

按張氏世仕晉晉分爲三又世仕韓此卽晉之公族以字爲氏者譜家謂黃帝子少昊青陽氏第五子揮爲弓正觀弧星始制弓矢主祀弧星賜姓張氏此非

命姓氏之義也按晉有解張字張侯自此晉國世有張氏則因張侯之字以命氏可無疑也

孫氏

按孫氏姬姓衛武公之後武公和生公子惠孫惠孫生耳為衛上卿食邑于戚生武符亦曰孫仲以王父字為氏孫仲生炎曰孫昭子自昭子六世至孫嘉世居汲郡晉有孫登即其裔也又有孫氏芊姓楚令尹孫叔敖之後又有孫氏媯姓齊陳敬仲四世孫桓子無宇之後或言桓子之子書戍世曰有功齊景公賜姓

孫氏非也以字為氏何甲賜為此當是桓子祖父字也桓子曾孫武以齊之田鮑四族謀為亂奔吳為將武之子明食采於富春自是世為富春人

皇朝通志

卷六

十一

大正五年六月廿五日
皇朝通志卷六十一
十一

